

1 CORINTIOS

¹ Pablojon quic'ot la quermano Sóstenes, palybilon ti apóstol i cha'an Jesucristo che' bajche' yom Dios. ² Wolic ts'ijbubeñetla ili jun, xñopt'añet bΛ la i cha'an Dios ya' ti Corinto. Tsa'ix ajq'uiyetla ti' wenta Dios. Palybiletla cha'an mi la' wochel ti Cristo Jesús la' wic'ot pejtél mu' bΛ i pejcañob lac Yum Jesucristo ti' c'aba', baqui jach añob. Jini lac Yum i yumΛch ja'el. ³ La' aq'uentiquetla i yutslel i pusic'al Dios yic'ot i ñΛch'tΛlel la' pusic'al ch'oyol bΛ ti Dios lac Tat yic'ot ti lac Yum Jesucristo.

Wocolix i yΛΛ Dios

⁴ Ti pejtelel ora mic suben c Dios wocolix i yΛΛ cha'añetla, come aq'uebiletla i yutslel i pusic'al Dios ti Cristo Jesús. ⁵ Ti Cristo tsa' p'ojli la' wenlel ti pejtelel chuqui tac uts'at. Jini cha'an wen la' wujil t'an, wen an la' ña'tΛbal. ⁶ Come woli' tsictiyel i ye'tel Cristo ti la' tojlel che' bajche' tsac subeyetla. ⁷ Che' jini ma'anic chuqui anto yom la' cha'an, come wen chajpΛbiletla woli la' pijtan lac Yum Jesucristo mu' bΛ caj i tsictiyel. ⁸ Mi caj i chΛn xuc'chocoñetla c'ΛΛΛ ti' jilibal cha'an ma'anic la' mul che' ti' q'uiñilel lac Yum Jesucristo. ⁹ Xuc'ul Dios tsa' bΛ i palyayetla cha'an mi la' tem ajñel yic'ot i Yalobil, jiñΛch Jesucristo lac Yum.

¿T'oxol ba Cristo?

¹⁰ Hermanojob, mic subeñetla ti wocol t'an ti' c'aba' lac Yum Jesucristo, yom junlajal mi la' cha'len t'an. Mach mi la' t'ox la' bΛ ti leto. Tem

ajñenla ti uts'at ti jump'ejl la' pusic'al ti jump'ejl la' ña'tabal. ¹¹ Come jini año' bΛ ti' yotot Cloé tsi' subeyoñob woli la' wΛ'len la' bΛ, quermanojob. ¹² Mi cΛl isujm, come ti chajp ti chajp mi la' cha'len t'an ti jujuntiquiletla. Juntiquil mi' yΛl: Joñon i cha'añon Pablo. YambΛ mi' yΛl: Joñon i cha'añon Apolos. YambΛ mi' yΛl: Joñon i cha'añon Cefas. YambΛ mi' yΛl: Joñon i cha'añon Cristo. Che'Λch mi la' cha'len t'an. ¹³ ¿T'oxol ba Cristo? ¿Tsa' ba ch'ijle ti cruz Pablo cha'añetla? ¿Tsa' ba la' ch'ΛmΛ ja' ti' c'aba' Pablo? ¹⁴ Mic suben Dios wocolix i yΛΛ come ma'anic tsa cΛq'ueyetla ch'Λmja'. Cojach tsa cΛq'ueyob ch'Λmja' Crispo yic'ot Gayo, ¹⁵ ame anic majch mi' lon al tsa' aq'uentiyetla ch'Λmja' tij c'aba'. ¹⁶ Tsa cΛq'ue ch'Λmja' Estéfanos ja'el yic'ot jini año' bΛ ti' yotot. Mach cujilic mi tsa cΛq'ue ch'Λmja' yambΛ. ¹⁷ Come Cristo ma'anic tsi' chocoyon majlel cha'an mi cΛc' ch'Λmja'. Tsi' chocoyon majlel cha'an mic sub jini wen t'an. Mach ti' ña'tabalic jini pañimil mic sub ame sajtic i sujmllel i cruz Cristo.

Cristo, i p'ΛtΛlelyic'ot i ña'tabal Dios

¹⁸ Jini sajtemo' bΛ mi' yΛlob tonto jax i sujmllel jini cruz. Pero joñonla coltΛbilon bΛ la, la cujil jiñΛch i p'ΛtΛlel Dios. ¹⁹ Come ts'ijbubil: “Mi caj c jisΛbeñob i ña'tabal jini cabΛ bΛ i ña'tabal. Mi caj c socbeñob i pusic'al jini año' bΛ cabΛ i pusic'al”, che'en Dios. ²⁰ ¿Bacan jini cabΛ bΛ i ña'tabal? ¿Bacan jini sts'ijbaya? ¿Bacan jini mu' bΛ i ña'tan i sujmllel jini pañimil am bΛ wΛle? Dios tsa'ix i pΛsΛ sojqquem jax i ña'tabal jini pañimil. ²¹ Che' bajche' tsi' wΛn ña'ta Dios, jini año' bΛ ti pañimil ma'anic

mi' c'añob Dios cha'an ti' bajñel ña'tabal, come Dios mi' c'an jini t'an mu' bΛ i yajlel ti tonto cha'an mi' coltan jini mu' bΛ i ñopob, come che' yom i pusic'al. ²² Jini judíojob mi' wersa c'ajtibeñob i yejtal tac i p'atlel. Jini griegojob mi' sajcañob i ña'tabal pañimil. ²³ Pero joñonla mi lac sub Cristo tsa' bΛ ch'ijle ti cruz. Jini t'an mi' yac' ti yajlel judíojob. Tonto jax jini t'an mi' yalob gentilob. ²⁴ Pero jini palybilo' bΛ, mi judíojob, mi griegojob, mi' ña'tañob jini Cristo i p'atlelΛch Dios, i ña'tabalΛch Dios ja'el. ²⁵ I ña'tabal Dios mu' bΛ i yajlel ti tonto mach sojquemich che' bajche' i ña'tabal winicob. I melbal Dios mach bΛ anic i p'atlel mi' lon q'uelob winicob, ñumen p'atlelΛch bajche' i p'atlel winicob.

²⁶ Come ña'tanla, hermanojob, bajche' tsa' palyiyetla. Ma'anic cabal ñuco' bΛ am bΛ cabal i ña'tabal ti la' tojlel. Ma'anic cabal p'atlo' bΛ, mi cabal yumalob. ²⁷ Jini mu' bΛ i q'uejlel ti tonto wΛ' ti pañimil Dios tsi' yajca cha'an mi' yac' ti quisin jini cabal bΛ i ña'tabal. Tsi' yajca jini mach bΛ p'atlic ti pañimil cha'an mi' yac' ti quisin jini p'atlo' bΛ. ²⁸ Dios tsi' yajca jini mach bΛ ñuquic ti pañimil yic'ot jini ts'a'lebil bΛ yic'ot jini mach bΛ anic i c'ajñibal cha'an mi' jisan jini am bΛ i c'ajñibal ti' tojlel winicob. ²⁹ Che' jini ma'anic majqui mi mejlel i chañ'esan i bΛ ti' tojlel Dios. ³⁰ Come Dios tsi' yaq'ueyetla la' wajñel ti Cristo Jesús. Dios tsi' yaq'ueyonla Cristo. Jiñach lac ña'tabal tilem bΛ ti Dios. Jiñach tsa' bΛ i yac'ayonla ti' wenta Dios, tsa' bΛ i q'ueleyonla ti toj. Jiñach tsa' bΛ i yac'onla ti libre. ³¹ Jini cha'an, che' bajche' ts'ijbubil: "Jini yom bΛ i sub chuqui ñuc, la' i tsictesan i ñuclel lac

Yum”.

2

Cristo tsa' bΛ ch'ijle ti cruz

¹ Hermanojob, che' bΛ tsa' c'otiyon ba' añetla ma'anic tsac pejcayetla ti to'ol ch'ejl jach bΛ t'an yic'ot c bajñel ña'tΛbal che' bΛ tsac subeyetla i t'an Dios. ² Come tsa cΛΛ tic pusic'al ma'anic chuqui mi caj c ña'tan ti la' tojlel, cojach Jesucristo tsa' bΛ ch'ijle ti cruz. ³ Che' bΛ ya' añon quic'otetla wen c'uñon, cabΛ c bΛq'uen, tsiltsilñayon. ⁴ Che' bΛ tsac pejcayetla, che' bΛ tsac cha'le sub t'an cha'an mic xiq'uetla, tsiquil mach tilemic c t'an tic bajñel pusic'al pero tilem ti' p'ΛtΛlel Espiritu, ⁵ cha'an wen xuc'ul mi la' ñop. Come jiñach i ye'tel Dios yic'ot i p'ΛtΛlel, mach i ye'telic winicob cabΛ bΛ i ña'tΛbal.

ItsictesΛbal i yEspiritu Dios

⁶ Mic sub lojon i ña'tΛbal Dios ti' tojlel jini xuc'ul bΛ xñopt'añob. Ma'anic mic sub lojon i ña'tΛbal pañimil, mi i ña'tΛbal yumΛob mu' bΛ i jilelob. ⁷ Mic sub lojon i ña'tΛbal Dios mach bΛ tsictiyemic ti yambΛ ora, jini mucul bΛ i ña'tΛbal tsa' bΛ i wΛn wa'choco Dios che' bΛ maxto anic pañimil, cha'an mi' yΛq'ueñonla lac ñucl. ⁸ Jini yumΛob ti pañimil ma'anic tsi' cΛñayob i ña'tΛbal Dios mi juntiquilic. Tsa'ic i cΛñayob, ma'anic tsi' ch'ijiyob ti cruz lac Yum am bΛ i yumΛtel ti chan. ⁹ Come ts'ijbubil: “Jini mach bΛ q'uelbilic ti' wut winicob, jini mach bΛ ubibilic ti' chiquin winicob, jini mach bΛ anic tsi' ña'tayob winicob ti' pusic'al, jiñach tsa' bΛ i chajpa Dios cha'an mi' yΛq'ueñob jini mu' bΛ i c'uxbiñob Dios”, che'en.

10 Dios tsi' laj tsictesΛbeyonla ti' p'ΛtΛlel jini Espírítu, come jini Espírítu mi' ch'Λmben isujm pejtelel chuqui tac an yic'ot i sujmllel Dios wocol bΛ ti cΛñol. 11 ¿Am ba juntiquil winic mu' bΛ mejlel i cΛmben i pusic'al yambΛ winic? Ma'anic. Cojach i ch'ujlel jini winic mi' ña'tan chuqui an ti' bajñel pusic'al. Che' ja'el ma'anic majch mi' cΛmben i ña'tΛbal Dios, cojach i yEspírítu Dios. 12 Ma'anic tsa' aq'uentiyonla i ña'tΛbal pañimil. Tsa' aq'uentiyonla jini Espírítu ch'oyol bΛ ti Dios cha'an mi laj cΛn chuqui woli' yΛq'ueñonla Dios. 13 JiñΛch mu' bΛ c sub lojon. Jini t'an mu' bΛ c sub lojon mach tilemic ti winicob cabΛ bΛ i pusic'al ti pañimil, pero jini Espírítu tsi' cΛntesayon lojon. Mi' yΛq'ueñon lojon jini t'an cha'an mic tsictesΛbeñob jini mu' bΛ i jac'beñob jini Espírítu.

14 Jini mach bΛ anic Espírítu yic'ot, ma'anic mi' ch'Λmben isujm jini ch'oyol bΛ ti' yEspírítu Dios, come mi' yΛ tonto jax. Mach mejlic i ch'Λmben isujm, come cojach jini Espírítu mi' yΛq'ueñonla lac ch'Λmben isujm. 15 Jini am bΛ i cha'an jini Espírítu mux i mejlel i laj ch'Λmben isujm. Ma'anic majch mi' cΛmben i pusic'al jini winic. 16 Come ¿majqui tsi' cΛmbe i pusic'al lac Yum? ¿Majqui tsi' cΛntesa? Pero an lac cha'an i ña'tΛbal Cristo.

3

X'e'telonla yic'ot Dios

1 Che' jini hermanojob, ma'anic tsa' mejli c pej-cañetla che' bajche' mic pejcan jini mu' bΛ i jac'ob i yEspírítu Dios, come mi la' jac'ben jini tsucul bΛ la' pusic'al, come alΛlet to la ti Cristo. 2 Tsa

cʌq'ueyetla la' jap leche. Ma'anic tsa cʌq'ueyetla we'elʌl, come maxto mejlic la' c'ux. C'ʌʌl wʌle mach mejliquetla. ³ Come woli to la' jac'ben i tsuculel la' pusic'al. Woli la' tsʌjyuben la' bʌ la' wenlel. Woliyetla ti leto. Woli la' t'ox la' bʌ ti t'an. Che' jini ζmach ba wolic la' jac'ben i tsuculel la' pusic'al? ζMach ba lajalic woli la' cha'len che' bajche' i cha'año' bʌ pañimil? ⁴ Come juntiquil mi' yʌl: Ti isujm i cha'añoʌn Pablo, che'en. Yambʌ mi' yʌl: I cha'añoʌn Apolos, che'en. ζMach ba wolic la' jac'ben i tsuculel la' pusic'al?

⁵ ζMajqui jini Pablo che' jini? ζMajqui jini Apolos? X'e'telon lojon tsa' bʌ cʌq'ueyet la' ñop Dios cha'an ti' p'ʌtʌlel lac Yum tsa' bʌ i yʌq'ueyon lojon ti jujuntiquilon lojon. ⁶ Joñoʌn tsac cha'le pac'. Apolos tsi' mulu. Dios tsi' yʌc'ʌ ti coel. ⁷ Che' jini mach ñuquic jini mu' bʌ i cha'len pac' yic'ot jini mu' bʌ i mul. Cojach ñuc Dios mu' bʌ i yʌc' ti coel. ⁸ Jini mu' bʌ i cha'len pac' yic'ot jini mu' bʌ i mul junlajalob. Ti jujuntiquil mi' caj i yʌq'uentelob i chobejtʌbal che' bajche' an i ye'tel. ⁹ Come joñoʌn lojon x'e'telon lojon yic'ot Dios. Jatetla i choletla Dios, i yototetla Dios.

¹⁰ Joñoʌn che' bajche' tsa' aq'uentiyon i yutslal i pusic'al Dios, tsac ts'ajquibe i c'ʌclib otot che' bajche' juntiquil wen yujil bʌ i wa'chocontel otot. Yambʌ mi' wa'chocon i ye'tel ti' pam i c'ʌclib. Ti jujuntiquil la' i q'uel bajche' mi' wa'chocon i ye'tel ti' pam. ¹¹ Come ma'anic majqui mi' mejlel i yʌq'uen yambʌ i c'ʌclib otot. Jini laj c'ʌclib jiñach Jesucristo. ¹² Mi an majch mi' c'ʌn oro, mi tsucul taq'uin, mi c'ax wen bʌ xajlel, mi te', mi jam, mi tiquin pimel cha'an mi' wa'chocon otot ti' pam

jini c'aclib, ¹³ mi caj i tsictiyel bajche' yilal i ye'tel jujuntiquil winic ti jini q'uin che' mi' yajq'uel ti tsictiyel. Mi caj i tsictiyel ti c'ajc mi weñach i ye'tel jujuntiquil winic. ¹⁴ Mi ma'anic tsa' jili ti c'ajc i ye'tel tsa' b_Λ i wa'choco ti' pam, mi caj i yajq'uentel i chobejt_Λbal. ¹⁵ Mi tsa' puli i ye'tel ma'anix i chobejt_Λbal, come sajtem i ye'tel, pero mi caj i colt_Λntel jini winic che' bajche' juntiquil tsa' b_Λ i y_ΛΛ pulel ti c'ajc.

¹⁶ ¿Mach ba la' wujilic? Jatetla i templojetla Dios. I yEspíritu Dios mi' chumt_Λl la' wic'ot. ¹⁷ Mi an majch mi' jis_Λben i templo Dios, Dios mi caj i jisan jini winic, come ch'ujul i Templo Dios. Jatetla i templojetla.

¹⁸ Mach a jac' a lotintel. Mi an majch mi lon al ti' pusic'al an cab_Λl i ña't_Λbal ti jini pañimil, la' i q'uel i b_Λ ti tonto cha'an mi mejlel i taj wen b_Λ i ña't_Λbal. ¹⁹ Come Dios mi' q'uel ti tonto i ña't_Λbal jini pañimil che' bajche' ts'ijbubil: “Dios mi' tsictesan lolom jach jini año' b_Λ cab_Λl i ña't_Λbal che' maya jax woli' melob”, che'en. ²⁰ Ts'ijbubil ja'el: “Lac Yum yujil lolom jach chuqui mi' y_Λlob ti' bajñel pusic'al jini año' b_Λ cab_Λl i ña't_Λbal”, che'en. ²¹ Jini cha'an mach yomix mi la' t'ox la' b_Λ cha'an mi la' tsajcan winicob. Come la' cha'añach pejtelel chuqui tac an, ²² yic'ot pejtel winicob, mi Pablo, mi Apolos, mi Pedro, mi jini pañimil yic'ot chuqui woli' yujtel w_Λle yic'ot chuqui mi' caj ti ujt_Λl che' cuxuletla yic'ot che' mi la' ch_Λmel. ²³ Jatetla i cha'añetla Cristo. Cristo i cha'añach Dios.

Apóstolob i cha'an Cristo

¹ La' i ña'tañob winicob x'e'telon lojon i cha'an Cristo. Xc̄antayajon lojon cha'an i sujml̄el Dios mach b̄a tsictiyemic ti yamb̄a ora. ² Jini xc̄antaya wersa yom xuc'ul mi' p̄as i b̄a ti' ye'tel i yum. ³ Ma'anic mic mel c pusic'al cha'an chuqui mi' ȳalob winicob, mi jatetla mi yañō' b̄a, mi woli la' w̄al uts'aton o mach uts'atonic. ⁴ Anquese ma'anic woli ti t'an c pusic'al, ma'anic mic sub c b̄a ti uts'at. Jini mu' b̄a i q'uelon, mu' b̄a caj i melon, jiñ̄ach lac Yum. ⁵ Jini cha'an mach mi la' sub mi uts'at o mi mach uts'atobic winicob x'ixicob che' maxto i yorajlelic, che' maxto tilemic lac Yum. Come lac Yum mi caj i tsictesan jini mucul tac b̄a mach b̄a tsictiyemic. Mi caj i ȳac' ti tsictiyel chuqui woli lac ña'tan ti lac pusic'al. Che' jini Dios mi caj i tsictes̄abeñob i ñucl̄el winicob ti jujuntiquil.

⁶ C'ux mi cubiñetla hermanojob. Jini cha'an tsa'ix c tajbe i c'aba' Apolos yic'ot j c'aba' cha'an mij c̄antesañetla bajche' yom mi la' cha'len. Com mi la' q'uel ti joñon lojon bajche' yom mi la' wajñel che' bajche' ts'ijbubil. Mach mi la' sub ti ñuc juntiquil cha'an mi la' ts'a'len yamb̄a. ⁷ Come ¿majqui tsi' ȳalq'ueyeta la' c'ajñibal ti chajp ti chajp? ¿Mach ba aq'uebileticla ti la' majtan jach? Mi tsa' aq'uentiyetla, ¿chucoch ñuc mi la' q'uel la' b̄a che' bajche' mach aq'uebiletic la ti la' majtan?

⁸ Mi la' lon al jas̄lix la' c̄antes̄antel ti Dios, cab̄lix la' ña't̄abal. Che' mach ya'ic añon lojon la' wic'ot mi la' lon mel la' b̄a che' bajche' reyetla. Uts'at, aja reyeticla cha'an temel mi lac cha'len rey. ⁹ Apóstolon lojon. Mi c̄al Dios tsi' ȳac'ayon lojon ti q'uejlel ti wi'il pat che' bajche'

chuchbil b_Λ winicob mu' b_Λ caj i ts_Λns_Λantelob, come tsi' y_Λc'ayon lojon ti pañimil ba' mi' q'ueloñob jini ángelob yic'ot winicob x'ixicob. ¹⁰ Tonto mij q'uejlel lojon cha'an c'ux mi cubin lojon Cristo, pero cab_Λ la' ña't_Λbal ti Cristo. C'uñon lojon, pero p'_Λt_Λletla. An la' ñucl_Λ, pero ts'a'lebilon lojon. ¹¹ C'_Λl_Λ w_Λle mi cubin lojon wi'ñal yic'ot tiquin ti'. Pits'ilon lojon, lojwemon lojon ti asiyal. Ma'anic cotot lojon ba' mic chumt_Λ. ¹² Mic cha'len lojon w_Λrsa e'tel tij c'_Λb. Che' mi' p'ajoñob mic pejcañob ti wen b_Λ t'an. Che' mi' tic'lañoñob, mij cuchben lojon. ¹³ Che' mi' yu'yajiñoñob, mic pejcañob ti uts b_Λ t'an. Mij q'uejlel lojon c'_Λl_Λ w_Λle che' bajche' misujel_Λ, che' bajche' i bibi'lel pejt_Λel chuqui mi' chojq_Λuel.

¹⁴ Mach cha'anic mij quisnitesañetla wolic ts'ijban jini t'an, pero cha'an mic xic'beñetla ti uts'at come c'uxbibil b_Λ calobiletla. ¹⁵ Anic la' cha'an lujump'ejl mil x_Λantesajob ti Cristo, juntiquil jach la' tat. Come ti Cristo Jesús joñon tsac techeyetla ti jini wen t'an. ¹⁶ Jini cha'an la' wolic mic subeñetla, melela che' bajche' mic mel. ¹⁷ Jini cha'an tsac choco majlel Timoteo ba' añetla. Jiñ_Λch c'uxbibil b_Λ calobil. Xuc'ul i pusic'al ti lac Yum. Mi caj i y_Λq'ueñetla la' cha' ña'tan chuqui mic cha'len ti Cristo. Che' bajche' mij c_Λntesan xñopt'añob ti pejtelel pañimil baqui jach mi' tempañob i b_Λ, che'_Λch mic mel ja'el. ¹⁸ Lamitaletla ñuc mi la' q'uel la' b_Λ cha'an woli la' lon al ma'anix mic ch_Λn tilel ba' añetla. ¹⁹ Pero mach jalix mi caj j c'otel ba' añetla mi yom lac Yum. Mi caj j q'uel mi an i p'_Λt_Λlel jini mu' b_Λ i lon q'uelob i b_Λ ti ñuc o mi to'ol t'an jach woliyob.

²⁰ Come mach to'ol t'anic jach i yum^Λantel Dios pero an cab^Λ i p'^Λt^Λlel. ²¹ ¿Chuqui la' wom? ¿La' wom ba mic ch'^Λm tilel asiyal ba' añetla o la' wom ba mic tilel ti c'uxbiya yic'ot i yutslel c pusic'al?

5

Juntiquil tsa' b^Λ i taja i ts'i'lel

¹ Isujm woli' y^Λlob an juntiquil ti la' tojlel woli b^Λ i taj i ts'i'lel, ñumen leco bajche' mi' melob jini sajtemo' b^Λ, come jini winic wolix i yajñel yic'ot i majaña'. ² Jatetla chan mi la' lon mel la' b^Λ. ¿Mach ba yomic mi la' wuc't^Λben i mul? ¿Mach ba yomic mi la' choc loq'uel ti la' tojlel jini tsa' b^Λ i mele bajche' jini?

³ Isujm mach ya'ic añon la' wic'ot tic b^Λc'tal, pero ya' añon ti espíritu. Tsa'ix c ña'ta bajche' yom mi' mejlel jini am b^Λ i mul. ⁴ Che' temel añetla ya'^Λch añon quic'otetla yubil, come ya'an i p'^Λt^Λlel lac Yum Jesucristo. Ti' c'aba' lac Yum Jesucristo mic subeñetla, ⁵ la' poj chojquic loq'uel ti la' tojlel jini winic cha'an mi' yajñel ti' wenta Satanás, cha'an mi' yubin wocol, cha'an mi' jis^Λantel i tsucul pusic'al, cha'an mi' colt^Λantel i ch'ujlel ti' q'uiñilel lac Yum.

⁶ Mach wenic mi la' q'uel la' b^Λ ti ñuc. ¿Mach ba la' wujilic mi' p'ojlel majlel mulil che' bajche' ts'ita' jach levadura mi' laj xaxan ti' junc'ojlel caxlan waj? ⁷ Chocloa loq'uel jini tsucul b^Λ la' melbal come tsijib melbiletix la. Come jini lac Tiñ^Λme' cha'an Pascua jiñ^Λch Cristo tsa' b^Λ ajq'ui ti ch^Λmel cha'añonla. ⁸ Jini cha'an la' lac mel q'uin ti uts'at. Mach yomic tsucul b^Λ levadura, jiñ^Λch jontolil

yic'ot mulil. Yom jini isujm b_Λ waj mach b_Λ anic i levadurajlel, jiñ_Λch i s_Λclel lac pusic'al.

⁹ Tsac ts'ijbubeyetla tic jun cha'an mach yomic mi la' wajñel yic'ot jini mu' b_Λ i tajob i ts'i'lel. ¹⁰ Isujm, mach mejlic la' junyajlel loq'uel ti' tojlel i cha'año' b_Λ pañimil mu' b_Λ i tajob i ts'i'lel, mu' b_Λ i ch_Λcleño_b i chub_Λ'an, mu' b_Λ i cha'leño_b xujch', mu' b_Λ i c'uxbiño_b dioste' tac. Muq'uc la' junyajlel loq'uel ti' tojlelob, actan che' jini, ma'añetixla ti pañimil. ¹¹ Mic ts'ijbubeñetla w_Λle, mach mi la' ñochtan mi juntiquilic, anquese mi' sub i b_Λ ti hermano, mi woli' taj i ts'i'lel, mi an i ch_Λclel, mi woli' c'uxbin dioste' tac, mi woli' cha'len p'ajoñel, mi woli ti y_Λc'Λjel, mi woli ti xujch'. Mach mi la' cha'len we'el yic'ot. ¹² ¿Am ba que'tel cha'an mic mel jini mach b_Λ ochemobic? ¿Mach ba la' wentajic mi la' mel jini ochemo' b_Λ? ¹³ Come Dios mi caj i mel jini mach b_Λ ochemobic. Chocla loq'uel ti la' tojlel jini xjontolil.

6

Che' mi' melob i b_Λ jini xñopt'año_b

¹ Jixcu jatetla che' mi la' contrajin la' b_Λ ti meloñel, ¿yom ba mi la' majlel la' mel la' b_Λ ba'an jini am b_Λ i ye'tel mach b_Λ i c_Λñ_Λyic Dios? ¿Mach ba yomic mi la' mel la' b_Λ ti' tojlel i cha'año' b_Λ Dios? ² ¿Mach ba la' wujilic? I cha'año' b_Λ Dios mi caj i melob i cha'año' b_Λ pañimil. Mi wersa mi caj la' mel i cha'año' b_Λ pañimil, ¿mach ba mejlic la' mel jini mu' b_Λ i cha'leño_b leto ti la' tojlel? ³ ¿Mach ba la' wujilic mi caj lac mel ángelob? Jini cha'an ñumen mi mejlel lac mel winicob ila ti pañimil. ⁴ Mi an

ti la' wenta cha'an mi la' melob cha'an chuqui tac woli ti ujtel ti ili ora, ¿chucoch mi la' chocob majlel ba'an winicob mach b_Λ hermanojobic cha'an mi' melob? ⁵ Yom mi la' cha'len quisin. ¿Mach ba anic mi juntiquilic hermano yujil b_Λ meloñel ti la' tojlel? ⁶ Jini hermanojob mi' contrajiñob i b_Λ. Mi' majlelob ti meloñel ti' tojlel jini mach b_Λ anic mi' ñopob Dios.

⁷ Anix la' sajtemal che' jini, come woli la' contrajin la' b_Λ ti' tojlel jini sajtemo' b_Λ. ¿Chucoch ma'anic mi la' cuchben i mul la' wermano che' mi' techbeñetla wocol? ¿Chucoch ma'anic mi la' ñus_Λben che' mi' chilbeñet la' chub_Λ'an? ⁸ Jatetla mi la' mel chuqui mach tojic. Mi la' cha'len chiloñel, mi la' contrajin la' wermanojob.

⁹ ¿Mach ba la' wujilic? Ma'anic mi caj i yocheLOB ti' yum_Λntel Dios jini mach b_Λ tojobic. Mach mi la' ñop lot. Ma'anic mi caj i yocheLOB ti' yum_Λntel Dios jini mu' b_Λ i tajob i ts'i'lel, mi jinic mu' b_Λ i c'uxbiñob dioste' tac, mi jinic mu' b_Λ i tajob i yixic, mi jinic mach b_Λ anic mi' tic'ob i colosojlel i pusic'al, mi jinic winicob mu' b_Λ i w_Λlac pi'leñob i b_Λ. ¹⁰ Jini xchiloñelob, jini xch_Λclelob, jini xy_Λc'ajelob, jini xp'ajoñelob, jini xujch'ob ma'anic mi caj i yocheLOB ti' yum_Λntel Dios. ¹¹ Lamitaetla che'ach tsa' la' mele, pero w_Λle pocbiletixla ti' c'aba' lac Yum Jesucristo cha'an ti' yEspíritu lac Dios. Tsa'ix ajq'uiyetla ti' wenta Dios. Wolix la' q'uejlel ti toj.

Tsictesanla i ñuel Dios ti la' b_Λ'tal

¹² Mi mejlel c mel pejtél chuqui com, mach tic'bilonic, pero mach uts'atic mi tsac mele ti pejtél. Chuqui jach com c mel, mi mejlel c mel, pero ma'anic mi caj c mel ame ñ_Λm'ac c pusic'al.

13 Uts'at we'elal cha'an lac ñac'. Jini lac ñac' i yajñibach we'elal. Pero Dios mi caj i jisan lac ñac' yic'ot we'elal. Jini lac bac'tal mach cha'anic ts'i'lel, i cha'añach lac Yum. Lac Yum mi caj i coltan lac bac'tal. 14 Dios tsa' ba i teche ch'ojyel lac Yum mi caj i techonla ch'ojyel ja'el ti' p'atlel. 15 ¿Mach ba la' wujilic i cha'añach Cristo la' bac'tal? ¿Yom ba mij c'an c bac'tal che' i cha'anix Cristo, cha'an mi caq'uen ts'i'lel ba x'ixic? Mach yomic. 16 ¿Mach ba la' wujilic? Jini mu' ba i pi'len juntiquil moja, jump'ejl jach mi' majlel i bac'tal yic'ot. Come Dios mi' ya: “Jini cha'tiquil mi' yochelob ti juntiquil jach”, che'en. 17 Jini mu' ba i yajñel yic'ot lac Yum mi' yochel ti jump'ejl i pusic'al yic'ot lac Yum. 18 Puts'tanla ts'i'lel. Jini mu' ba i cha'len ts'i'lel ñumen mi' tic'lan i bac'tal bajche' jini mu' ba i cha'len yan tac ba mulil. 19 ¿Mach ba la' wujilic? La' bac'tal i templojach jini Ch'ujul ba Espíritu tsa' ba i yaq'ueyetla Dios mu' ba i yajñel ti la' pusic'al. Mach la' bajñel wentajic la' ba. 20 Come tsa' mājñiyetla, tojbiletla. Tsictesanla i ñucllel Dios ti la' bac'tal yic'ot ti la' ch'ujlel, come i cha'añach Dios.

7

Bajche' yom mi' yajñelob winicob x'ixicob

1 Wolic ña'tan chuqui tsa' la' ts'ijbubeyon. Uts'at mi ma'anic mi' paly x'ixic winic. 2 Pero an cabal mu' ba i tajib i yixic. Jini cha'an la' i paly i yijñam jujuntiquil winic. La' i taj i ñoxi'al jujuntiquil x'ixic. 3 Jini winic la' i pi'len i yijñam ti uts'at, che' ja'el i yijñam la' i pi'len i ñoxi'al ti uts'at. 4 Jini x'ixic mach i bajñel cha'anic i bac'tal, come mi' yuman i ñoxi'al.

Che' ja'el i ñoxi'al mach i bajñel cha'anic i bΛc'tal, come mi' yuman i yijñam. ⁵ Mach la' cΛy la' pi'len la' bΛ, cojach mi la' wom ti la' cha'ticlel cha'an mi la' wΛc' la' bΛ ti oración. Che' mi' yujtel oración yom mi la' cha' pi'len la' bΛ ame i pΛyetla ti mulil Satanás che' ma'anic i p'ΛtΛlel la' pusic'al. ⁶ Che'Λch mic sub cha'an mij coltañetla. Mach ti madaric wolic sub. ⁷ Come mi cΛl uts'at mi lajalob pejtél winicob che' bajche' joñon. Pero ti jujuntiquil an i c'Λjñibal aq'uebil bΛ i cha'an Dios. Juntiquil an junchajp i c'Λjñibal, yambΛ an yambΛ i c'Λjñibal.

⁸ Mic suben jini i bajñel jax to bΛ añob yic'ot ja'el jini xmeba ixicob cha'an uts'at mi' chΛn ajñelob che' bajche' joñon. ⁹ Mi mach mejlicob i bajñel ajñelob ti uts'at, la' i cha'leñob ñujpuñel. Uts'at mi' cha'leñob ñujpuñel. Mach uts'atic mi' jac'ob i colosojlel i pusic'al.

¹⁰ Mic subeñob jini ñujpuñemo' bΛ, pero mach c mandaric wolic sub. I mandarΛch lac Yum: Jini x'ixic mach i lon cΛy i ñoxi'al. ¹¹ Mi tsi' cΛyΛ i ñoxi'al x'ixic la' ajnic ti' bajñelil. Mi mach yomic ajñel ti' bajñelil, la' i mel i bΛ ti uts'at yic'ot i ñoxi'al. Che' ja'el winic, mach i choc loq'uel i yijñam.

¹² Jiñach mu' bΛ c sub joñon. Ma'anic tsi' subu lac Yum: Mi ma'anic mi' ñop lac Yum i yijñam juntiquil hermano, mach i choc loq'uel i yijñam che' yom to ajñel jini x'ixic yic'ot. ¹³ Mi ma'anic mi' ñop lac Yum i ñoxi'al juntiquil hermana, mach i cΛy i ñoxi'al che' yom to ajñel jini winic yic'ot. ¹⁴ Come jini winic mach bΛ anic mi' ñop lac Yum, mi' poj q'uejlel ti sΛc ti Dios che' woli' yajñel yic'ot i yijñam mu' bΛ i ñop lac Yum. Jini x'ixic mach bΛ

anic mi' ñop lac Yum, mi' poj q'uejlel ti sac ti Dios che' woli' yajñel yic'ot i ñoxi'al mu' b_Λ i ñop. Mi mach che'iqui, mach sacquic mi' q'uejlel la' walobilob. Wale ch'ujulob mi' q'uejlelob. ¹⁵ Mi yom loq'uel majlel jini mach b_Λ anic mi' ñop lac Yum, la' loq'uic. Che' jini juntiquil hermano mi winic mi x'ixic mach ch_Λn anix ti' p'at_Λlel i pi'al mi tsa' loq'ui i pi'al. Tsa'ix i p_Λy_Λyonla Dios cha'an ñach'al mi la cajñel. ¹⁶ Hermana, ¿mach ba a wujilic? Tic'al mi mejlel a coltan a ñoxi'al cha'an mi' ñop. Hermano, ¿mach ba a wujilic? Tic'al mi mejlel a coltan a wijñam cha'an mi' ñop.

¹⁷ Ti jujuntiquil winic la' ajnic che' bajche' tsa' aq'uenti i c'ajñibal ti lac Yum che' bajche' Dios tsi' p_Λy_Λ ti jujuntiquil. Che' i mij cantesan xñopt'añob baqui jach mi' tempañob i b_Λ. ¹⁸ Mi an majch mi' p_Λjyel ti Dios che' tsepbilix i p_Λch_Λlel, che'ach yom mi' yajñel. Mi an majch mi' p_Λjyel che' mach tsepbilic i p_Λch_Λlel, mach i y_Λc' ti tsepol. ¹⁹ Come ma'anic chuqui mi' cha'len mi tsepbil o mi mach tsepbilic lac p_Λch_Λlel. Pero yom Dios mi lac jac'ben i mandar. ²⁰ Ti jujuntiquil la' ajnic che' bajche' tsi' taja Dios che' b_Λ tsi' p_Λy_Λ. ²¹ ¿Tsa' ba p_Λjyiyet che' añet ti a yum? Mach a mel a pusic'al. Pero mi tsa' mejliyet ti loq'uel ñumen uts'at. ²² Come lac Yum tsa' b_Λ i p_Λy_Λ jini am b_Λ ti' yum, tsa'ix i y_Λc'_Λ ti libre. Pero jini tsa' b_Λ p_Λjyi che' libre an, tsa'ix ochi ti' wenta cha'an mi' yuman Cristo. ²³ Tsa' m_Λjnyietla. Tojbiletla. Ña'tanla mach ch_Λn i cha'añetixla winicob. ²⁴ Hermanojob, bajche' jach añetla che' b_Λ tsi' p_Λy_Λyetla Dios, che'ach yom mi la' wajñel ti Dios ti jujuntiquiletla.

25 Ma'anic tsa' aq'uentiyon mandar ti lac Yum cha'an mic subeñob xch'oc tacob. Cojach mic sub chuqui wolic ña'tan tic pusic'al, come lac Yum ti' yutslel i pusic'al tsi' y_Λc'ayon ti ajñel ti xuc'ul. 26 An cab_Λ wocol ti ili ora. Jini cha'an mi c_Λl uts'at mi che' jach mi' yajñelob winicob che' bajche' añob. 27 Mi an a wijñam, mach a ñop a c_Λy. Mi ma'anic a wijñam, mach a sajcan a wijñam. 28 Mi tsa' p_Λy_Λ a wijñam, mach mulilic. Che' ja'el jini xch'oc mi tsi' taja i ñoxi'al, mach mulilic. Pero jini mu' b_Λ i p_Λyob i b_Λ, wersa mi caj i yubiñob wocol ti pañimil. Mach comic mi la' taj jini wocol. 29 Mic subeñetla hermanojob, jumuc' w_Λ' añonla. Jini año' b_Λ i yijñam la' i melbeñob i ye'tel lac Yum che' bajche' jini mach b_Λ añobic i yijñam. 30 Jini mu' b_Λ i cha'leñob uq'uel che'ach mi caj i yajñelob bajche' jini mach b_Λ anic mi' cha'leñob uq'uel. Jini tijicñayo' b_Λ che'ach mi caj i yajñelob bajche' jini mach b_Λ tijicñayobic. Jini mu' b_Λ i cha'leñob m_Λñoñel che'ach mi caj i yajñelob bajche' jini mach b_Λ añobic i chub_Λ'an. 31 Jini mu' b_Λ i c'añob chuqui tac an ti pañimil che'ach mi caj i yajñelob bajche' jini mach b_Λ anic mi' c'añob, come pejtél chuqui mi laj q'uel ti pañimil, jilel jach woli.

32 Mach comic mi la' mel la' pusic'al. Jini mach b_Λ anic i yijñam mi' ch_Λn ña'tan lac Yum cha'an mi' mel chuqui mi' mulan lac Yum. 33 Jini am b_Λ i yijñam mi' ch_Λn ña'tan i ye'tel ti pañimil cha'an tijicña mi' q'uel i yijñam. 34 Che' ja'el mach lajalic x'ixic am b_Λ i ñoxi'al yic'ot xch'oc mach b_Λ anic i ñoxi'al. Jini mach b_Λ anic i ñoxi'al mi' ch_Λn ña'tan lac Yum cha'an s_Λc mi' yajñel i b_Λc'tal yic'ot i ch'ujlel. Jini x'ixic am b_Λ i ñoxi'al mi' ña'tan i ye'tel ti pañimil

cha'an tijicña mi' yubin i ñoxi'al. ³⁵ Mic sub jini t'an cha'an mij coltañetla, mach cha'anic mi' la' chujquel ti yac, pero cha'an mi' la' mel chuqui wen yic'ot chuqui toj, cha'an ma'anic chuqui mi' mactañetla la' wen tsajcan lac Yum.

³⁶ Mi an winic mu' b_Λ i ña'tan mach uts'atic woli' cha'len che' ma'anic mi' sijin i yalobil c'ΛΛΛ mi' ñejp'an, mi wersa yom i sijin, la' i y_Λc' ti ñujpuñel i yalobil che' bajche' yom i pusic'al. Mach mulilic.

³⁷ Pero jini xuc'ul b_Λ i pusic'al mach b_Λ yomic i sijin i yalobil, come tsi' ña'ta i c_Λntan i yalobil che' mach wersajic mi' sijin, uts'at mi' mel che' ma'anic mi' y_Λc' ti ñujpuñel. ³⁸ Jini mu' b_Λ i sijin i yalobil uts'at mi' mel. Jini mach b_Λ anic mi' sijin ñumen uts'at mi' mel.

³⁹ Jini x'ixic an ti' wenta i ñoxi'al che' cuxul to i ñoxi'al. Mi tsa' ch_Λmi i ñoxi'al mi' mejlel i cha' cha'len ñujpuñel mi' yom, pero yom yic'ot winic ochem b_Λ ti lac Yum. ⁴⁰ Mi c_Λl, ñumen tijicña jini x'ixic mi' che' jach ti' bajñelil mi' yajñel. Cujil ja'el, añ_Λch quic'ot i yEspíritu Dios.

8

We'el_Λl aq'uebil b_Λ dios te' tac

¹ W_Λle, cha'an we'el_Λl aq'uebil b_Λ dioste' tac ti' majtan, la' cujil an lac ña't_Λbal ti lac pejtelel. Lac ña't_Λbal mi' y_Λq'ueñonla lac lon q'uel lac b_Λ ti ñuc, pero laj c'uxbiya mi' ñijcañonla ti coltaya. ² Mi an majch mi' lon ña'tan cab_Λl_Λch i pusic'al, maxto yujilic chuqui yom mi' ña'tan. ³ Mi an majch mi' c'uxbin Dios, c_Λmbil jini winic ti Dios.

⁴ ¿Yom ba mi' laj c'ux we'el_Λl aq'uebil b_Λ dioste' tac ti' majtan? La' cujil ma'anic i c'Λjñibal dioste'

tac ti pañimil, come ma'anic yambΛ Dios, juntiquil jach. ⁵ Mi' lon alob an cabΛl dios ti panchan yic'ot ti pañimil, come an cabΛl i diosob che' ja'el cabΛl yumΛlob, ⁶ pero ti lac tojlel an juntiquil jach Dios, jiñΛch lac Tat. Ya' ch'oyol pejtelel chuqui tac an. Tsi' meleyonla cha'an mi lac ñuq'uesan. An juntiquil jach lac Yum, jiñΛch Jesucristo. Ti' p'ΛtΛlel tsa' mejli pejtel chuqui tac an. Joñonla ja'el añonla cha'an Cristo.

⁷ Mach laj yujilobic i sujmllel jini t'an. Lamital mi' chΛn ña'tañob dioste' tac c'ΛlΛl wΛle che' mi' c'uxob we'elΛl aq'uebil bΛ dioste' tac. Come tile bixelob i pusic'al, mi' sojquelob che' mi' c'uxob. ⁸ Mach cha'anic we'elΛl mi' q'uelonla ti uts'at Dios. Mi woli lac tic' lac bΛ ti' c'uxol, o mi woli laj c'ux, ma'anic mi' yΛq'ueñonla lac wenlel ti' tojlel Dios. ⁹ ChΛcΛ q'uele la' bΛ ame la' wΛc' ti yajlel jini mach bΛ xuc'ulic i pusic'al che' an chuqui mi la' mel che' libre añetla. ¹⁰ Come mi tsi' q'ueleyet jini mach bΛ xuc'ulic i pusic'al che' buchulet ti mesa ya' ti' templo dioste' tac, come a wujil uts'at jini we'elΛl, mi caj i ñijcΛyel i pusic'al jini mach bΛ xuc'ulic cha'an mi' c'ux chuqui tac aq'uebil dioste' tac, anquese mi' lon ña'tan mach uts'atic. ¹¹ Che' jini cha'an ti a ña'tΛbal mi caj i sajtel jini winic. Cristo tsa' chΛmi cha'an jini winic. ¹² Che' jini ma' cha'len mulil ti' contra jini hermanojob. Che' ma' wΛc' ti asiyel i pusic'al jini mach bΛ xuc'ulic i pusic'al, ma' cha'len mulil ti' contra Cristo. ¹³ Mi cha'an jach we'elΛl mi' yΛjq'uel ti yajlel quermano, ma'anic mi caj j c'ux we'elΛl ti pejtelel ora ame mi cΛc' ti yajlel quermano.

9

Jini mu' b_Λ mejlel i c'ajtin apóstol

¹ ¿Mach ba apóstolonic? ¿Mach ba librejonnic? ¿Mach ba tsa'ic j q'uele Jesús lac Yum? ¿Mach ba jateticla que'tel ti lac Yum? ² Mi an majch mi' y_Λlob mach apóstolonic, mach che'ic jatetla come i sellojleletla que'tel ti lac Yum.

³ Mic subeñob jini mu' b_Λ i c'ajtibeñoñob: ⁴ ¿Mach ba mejlic c_Λq'uentel lojon chuqui mij c'ux lojon yic'ot chuqui mic jap lojon? ⁵ Che' an quijñam lojon, ¿mach ba mejlic c p_Λy lojon majlel quic'ot che' bajche' mi' melob yaño' b_Λ apóstolob yic'ot i yijts'iñob lac Yum yic'ot Pedro? ⁶ Cojach joñon quic'ot Bernabé, ¿mach ba mejlic j c_Λy lojon c mel yamb_Λ e'tel che' woliyon lojon ti subt'an?

⁷ ¿Am ba juntiquil soldado mu' b_Λ i cha'len e'tel ti' bajñel taq'uin? Jini mu' b_Λ i p_Λc' ts'usubil, ¿mach ba anic mi' c'uxben i wut? Jini mu' b_Λ i c_Λntan i y_Λlac', ¿mach ba anic mi' japben i leche? ⁸ ¿Jim ba i t'an jach winicob mu' b_Λ c sub? ¿Mach ba che'ic mi' y_Λl jini mandar ja'el? ⁹ Come ts'ijbubil ti' mandar Moisés: “Mach a c_Λchben i yej tat wacax mu' b_Λ i t'ucht_Λben loq'uel i wut trigo”. ¿Cojach ba tat wacax mi' c_Λntan Dios? ¹⁰ ¿Mach ba wolic i c_Λntañonla? Jini cha'an tsa' ts'ijbubentiyonla ili t'an: “Jini mu' b_Λ i top' lum, la' i pijtan jini mu' b_Λ caj ti colel. Jini mu' b_Λ i jats' loq'uel i wut trigo an i pijtaya cha'an mi caj i y_Λq'uentel lamital i wut”.

¹¹ Mi tsa'ix j c_Λntesayetla cha'an mi la' p'_Λt'an, ¿mach ba yomic mi la' w_Λq'ueñon lojon ts'ita' la' chub_Λ'an? ¹² Mi tsa' la' w_Λq'ueyob yaño' b_Λ ¿mach ba ñumen la' wentajic cha'an mi la' w_Λq'ueñon

lojon? Ma'anic tsaj c'ajtibeyet lojon, come mij cuch lojon chuqui tac wocol ame mic mactaben lojon i wen t'an Cristo.

¹³ ¿Mach ba la' wujilic? Jini mu' b_Λ i cha'leñob e'tel ti templo mi' c'uxob jini ac'bil b_Λ ti templo. Jini mu' b_Λ i y_Λq'ueñob i majtan Dios ya' ti pulantib mi' c'uxob chuqui ac'bil ya'i. ¹⁴ Che' ja'el tsi' y_Λc'Λ mandar lac Yum cha'an mi' y_Λq'uentelob jini subt'añob pejtelel chuqui tac yom cha'an i b_Λc'tal, come mi' subob jini wen t'an. ¹⁵ Pero ma'anic tsaj c'ajtibeyetla chuqui yom tic tojlel anquese an que'tel. Ma'anic mic ts'ijban jini jun cha'an mi la' w_Λq'ueñon chuqui yom cha'an c b_Λc'tal, ame jilic c ñucl_{el} ti jini wen t'an. Ñumen uts'at mi tsa' ch_Λmiyon. ¹⁶ Anquese mic sub jini wen t'an, mach mejlic c sub c b_Λ ti ñuc, come wersa ñijc_Λbil c pusic'al cha'an mic sub jini wen t'an. Mi caj c taj wocol mi ma'anic mic sub.

¹⁷ Mi ti pejtelel c pusic'al mic sub, an c chobejt_Λbal. Mi mach comic c sub jiñ_Λch c sajtemal, come tsa' aq'uentiyon jini e'tel. ¹⁸ ¿Chuqui c chobejt_Λbal che' jini? Che' mic sub jini wen t'an, jiñ_Λch c chobejt_Λbal che' mic sub i t'an Cristo ti chejachi. Jini cha'an ma'anic mij c'ajtin c tojol cha'an jini wen t'an.

¹⁹ Jini cha'an ma'anic winic mu' b_Λ c yuman. Tic bajñel pusic'al tsa'ix c_Λc'Λ c b_Λ ti x'e'tel i cha'an pejtelel winicob cha'an mi' ñopob cab_Λlob. ²⁰ Ti' tojlel israelob lajal mic mel c b_Λ bajche' israelob cha'an mi' ñopob. Ti' tojlel gentilob mu' b_Λ i jac'ob mandar (anquese mach ch_Λn c_Λch_Λlonix ti jini mandar), lajal mic mel c b_Λ bajche' jini mu' b_Λ i jac'ob mandar, cha'an mi' ñopob. ²¹ Ti' tojlel

winicob mach b_Λ anic mi' c_Λñob Dios lajal mic mel c b_Λ bajche' jini mach b_Λ anic mi' c_Λñob Dios, cha'an mi' ñopob. (Pero ti pejtelel c pusic'al wolic jac'ben i mandar Cristo.) ²² Ti' tojlel winicob mach b_Λ xuc'ulic mi' ñopob, mi cajñel bajche' juntiquil mach b_Λ p'_Λtalic cha'an mi' ñopob jini mach b_Λ añobic i p'_Λtal. Lajal mic mel c b_Λ bajche' pejtelel winicob cha'an mij coltañob che' bajche' jaytiquil mi' mejlel. ²³ Che' _Λch mic mel cha'an mi' c_Λñob jini wen t'an, cha'an mic taj c wenlel ja'el ti jini wen t'an quic'ot jini mu' b_Λ i ñopob.

²⁴ ¿Mach ba la' wujilic? Jini mu' b_Λ i cha'leñob ajñel ti' tojlel xq'uelojelob mi' cha'leñob ajñel ti pejtelelob, pero cojach juntiquil mi' taj i majtan. Cha'lenla ajñel jatetla che' bajche' jini mu' b_Λ i taj i majtan. ²⁵ Pejtelel mu' b_Λ i cha'leñob ajñel mi' bajñel c_Λntañob i b_Λ cha'an mi' y_Λq'uentelob i corona mu' b_Λ i jilel. Joñonla mi laj c_Λntan lac b_Λ cha'an mi la c_Λq'uentel corona mach b_Λ anic mi' jilel. ²⁶ Jini cha'an mic cha'len ajñel che' bajche' juntiquil yujil b_Λ baqui mi' majlel. Ma'anic mic cha'len cujoñel che' bajche' winic t'uchlaw bexlaw i c'_Λb. ²⁷ Mic tic' c b_Λc'tal cha'an mi' wersa jac'beñon, ame mic chilbentel j c'_Λjñibal che' b_Λ tsa'ix c subeyob winicob jini wen t'an.

10

Tic'ojel cha'an i ch'ujutes_Λntel dioste'

¹ Hermanojob, mach comic mi' ñaj_Λyel ti la' pusic'al bajche' tsa' ajniyob pejtelel lac ñojte'el che' b_Λ tsi' toj'esayob majlel Dios ti total. Ti pejtelelob tsa' ñumiyob majlel ti ojilil colem ñajb. ² Ti pejtelelob tsa'

aq'uentiyob ch'Λmja' yilal ti total yic'ot ti colem ñajb che' bΛ tsi' yΛc'Λyob i bΛ ti' wenta Moisés. ³⁻⁴ Ti pejtelelob tsi' c'uxuyob jini jach bΛ we'elΛl yic'ot ja' aq'uebilo' bΛ ti Dios. Tsa' loq'ui i ya'al ti jini Xajlel ac'bil bΛ ti Dios. Jini Xajlel tsa' bΛ i pi'leyob majlel jiñach Cristo. ⁵ Pero cabΛl lac ñojte'el mach uts'atobic ti' wut Dios. Jini cha'an tsa' jisΛntiyob ti colem bΛ i tiquiñal pañimil.

⁶ Che'Λch tsa' ujti cha'an lac tic'ol cha'an ma'anic mi lac mulan jontolil che' bajche' tsi' mulayob. ⁷ Mach la' ch'ujutesan dioste' tac che' bajche' yaño' bΛ, come ts'ijbubil: “Jini winicob x'ixicob tsa' buchleyob cha'an mi' cha'leño' we'el uch'el. Tsa' ch'ojyiyob ti son”, che'en. ⁸ Mach yomic mi la' cha'len ts'i'lel che' bajche' tsi' cha'leyob lamital. Tsa' chΛmiyob uxp'ejl i cha'c'al ti mil ti jump'ejl jach q'uin. ⁹ Mach yomic mi la' quilΛben i pusic'al lac Yum che' bajche' tsi' cha'leyob lamital. Tsa' jisΛntiyob ti lucum tac. ¹⁰ Mach la' cha'len wulwul t'an ti la' pusic'al che' bajche' tsi' cha'leyob jini tsa' bΛ jisΛntiyob cha'an jini Angel yujil bΛ tsΛnsa.

¹¹ Che'Λch tsa' ujtiyob cha'an laj cΛntesΛntel. Tsa' ts'ijbunti cha'an lac tic'ol joñonla cuxulonto bΛ la ti ili ora che' lΛc'Λlix i jilibal. ¹² Jini cha'an jini mu' bΛ i q'uel i bΛ ti xuc'ul, la' i cΛntan i bΛ ame yajlic. ¹³ Ma'anic mi junchajpic la' pΛyol ti mulil mach bΛ anic tsi' yubiyob yaño' bΛ. Xuc'ul i pusic'al Dios. Ma'anic mi' yΛq'ueñetla la' taj la' pΛyol ti mulil mach bΛ mejlic la' cuch. Che' mi la' pΛjyel ti mulil, Dios mi' yΛq'ueñetla la' p'ΛtΛlel cha'an mi la' cuch. Che' jini mi mejlel la' loq'uel ba' pΛybilet ti mulil.

Jini ch'ujul b_Λ waj

¹⁴ Jini cha'an c'uxbibilet b_Λ la, mach yomic mi la' ch'ujutesan dioste' tac. ¹⁵ Che'ach mic pejcañetla, come mi la' ña'tan pañimil. Ña'tanla bajche' yom mi la' jac'. ¹⁶ Che' mi lac tem ch'Λm jini vaso che' mi lac suben Dios wocolix i y_ΛΛ, ¿mach ba wolic lac tem taj lac wenlel ti' ch'ich'el Cristo? Che' mi lac tem c'ux jini waj mu' b_Λ lac xut', ¿mach ba wolic lac tem taj lac wenlel ti' b_Λc'tal Cristo? ¹⁷ Anquese cab_Λlonla, lajalonla bajche' junq'uejl waj. Jump'ejl i b_Λc'talonla Cristo, come ti pejtelelonla mi laj c'ux jini junq'uejl waj.

¹⁸ Ña'tanla bajche' mi' melob israelob. Jini mu' b_Λ i c'uxob jini we'el_Λ mu' b_Λ i y_Λq'ueñob Dios ti' majtan, ¿mach ba muq'uic i tem tajob i wenlel ti' tojlel pul_Λntib? ¹⁹ ¿Chuqui i sujmllel c t'an, che' jini? ¿Am ba i c'Λjñibal dioste' tac? ¿Am ba i c'Λjñibal jini aq'uebil b_Λ dioste' tac? Ma'anic. ²⁰ Pero jini sajtemo' b_Λ, che' mi' y_Λc'ob i majtan ti pul_Λntib, woli' y_Λq'ueñob xibajob. Ma'anic mi' y_Λq'ueñob Dios. Mach comic mi la' tem ajñel yic'ot xibajob. ²¹ Mach mejlic mi la' jap ti' vaso lac Yum mi woli la' jap ti' vaso xibajob. Mach mejlic la' c'ux waj ti' mesa lac Yum mi woli la' c'ux waj ti' mesa xibajob. ²² ¿Mu' ba lac techben i mich'ajel lac Yum? ¿Ñumen p'Λ_Λlon ba la bajche' lac Yum?

Melela chuqui tac wen cha'an mi' tsictiyel i ñuclel

Dios

²³ Pejtelel jini la com b_Λ lac mel mi mejlel lac mel, pero mach uts'atic mi tsa' lac mele ti pejtelel. Come ma'anic i c'Λjñibal ti pejtelel cha'an mi' xuc'chocoñonla. ²⁴ Mach i lon saclan i bajñel

wenlel mi juntiquilic. La' i ña'tan i wenlel yaño' b_Λ. ²⁵ C'uxula jini mu' b_Λ i choño'ob ti choño' we'el_Λ. Mach la' c'ajtibeño'ob mi aq'uebilix dioste' tac ame tejchic t'an ti la' pusic'al. ²⁶ Come i cha'an lac Yum jini lum yic'ot pejtelel i b_Λ. ²⁷ Mi tsi' p_Λy_Λyetla ti' yotot jini mach b_Λ wolic i ñop Dios, cucula mi la' wom majlel. C'uxula chuqui tac mi' y_Λq'ueñetla. Mach la' c'ajtiben mi aq'uebil dioste' tac ame tejchic t'an ti la' pusic'al. ²⁸ Mi an majch mi' subeñetla: Tsa'ix aq'uenti dioste' tac, mi che'en, mach mi la' c'ux ame tejchic t'an ti' pusic'al jini tsa' b_Λ i subeyetla, ²⁹ ame cajic ti t'an i pusic'al, mach a pusic'alic. ¿Chucoch mi' q'uejlel ti mulil jini mu' b_Λ c mel ti jump'ejl c pusic'al che' woli ti t'an i pusic'al yamb_Λ? ³⁰ Mi tsaj c'uxu ti' yutslel c pusic'al, ¿chucoch mij q'uejlel ti xmulil cha'an jini tsa' b_Λ j c'uxu che' b_Λ tsac sube Dios wocolix i y_Λl_Λ?

³¹ Mi an chuqui mi la' c'ux, che' jini, mi an chuqui mi la' jap, mi an yamb_Λ chuqui mi la' cha'len, cha'lenla ti pejtelel cha'an mi' tsictiyel i ñucllel Dios. ³² Mach mi la' w_Λc' ti yajlel judíojob, mi gentilob, mi xño'pt'año'ob i cha'año' b_Λ Dios. ³³ Joñon ja'el wolic ñop c mel chuqui uts'at ti' wut pejtelel winicob ti pejtelel chuqui mic mel. Ma'anic mic s_Λclan c bajñel wenlel. Mic s_Λclan i wenlel yaño' b_Λ cha'an mi' colt_Λntelob cab_Λlob.

11

Uts'at b_Λ ti' tojlel x'ixicob

¹ Melela che' bajche'on. Joñon ja'el mic mel che' bajche' Cristo. ² Hermanojob mic sub uts'at woli

la' mel, come c'ajalon la' cha'an. Woli la' chΛn jac' jini cΛntesa che' bajche' tsaj cΛntesayetla.

³ Com mi la' ña'tan, i Yum pejtelel winicob jiñach Cristo. I yum x'ixic jiñach winic. I yum Cristo jiñach Dios. ⁴ Mi mosol i jol winic che' mi' pejcan Dios o che' mi' cha'len subt'an, woli' ts'a'len i yum. ⁵ Che' mach mosolic i jol x'ixic woli bΛ ti oración yic'ot subt'an mi' ts'a'len i yum, come lajal yilal mi tsa' jujchinti i jol. ⁶ Mi ma'anic mi' mos i jol x'ixic, la' laj sejt'ic i jol. Mi quisintic mi' yubin che' set'bil i jol yic'ot che' jujchibil, la' i mos i jol. ⁷ Mach wenic mi tsi' moso i jol winic, come jiñach i yejtal Dios yic'ot i ñucllel Dios. Jini x'ixic i ñucllelΛch winic. ⁸ Come mach loq'uemic winic ti x'ixic, pero loq'uem x'ixic ti winic. ⁹ Come Dios ma'anic tsi' mele winic cha'an i wenlel x'ixic. Tsi' mele x'ixic cha'an i wenlel winic. ¹⁰ Jini cha'an la' tsictiyic ti' jol x'ixic i yejtal i p'ΛtΛlel winic, come woli' q'uelob jini ángelob.

¹¹ Ti lac Yum cΛyΛl x'ixic ti winic, cΛyΛl winic ti x'ixic. ¹² Come loq'uem x'ixic ti winic, che' ja'el winic tilem ti x'ixic. Ti' cha'ticlelob tilem ti Dios. ¹³ Ña'tanla jatetla bajche' yom. ¿I t'ojol ba mi' pejcan Dios x'ixic che' mach mosolic i jol? ¹⁴ ¿Mach ba anic mi' cΛntesañetla la' bajñel pusic'al, mach i t'ojolic che' tam i jol winic? ¹⁵ Mach che'ic x'ixic. Mi tam i jol i t'ojol jax, come aq'uebil i tsutsel i jol cha'an i mosil. ¹⁶ Mi an majch mi' tech cabΛl t'an mach che'ic mic mel lojon. Mach che'ic mi' melob xñopt'añob i cha'año' bΛ Dios.

I Cena lac Yum

(Mt. 26.26-29; Mr. 14.22-25; Lc. 22.14-20)

17 Pero mic subeñetla mach wenic woli la' mel. Ma'anic mij q'ueletla ti uts'at. Come che' mi la' tempan la' b_Λ ma'anic la' wenlel, pero leco mi la' wajñel. 18 Ñaxan tsa cubi woli la' t'ox la' b_Λ ti a'leya che' mi la' tempan la' b_Λ. Mi c_Λl isujm. 19 ¿Yom ba mi la' t'ox la' b_Λ ti a'leya cha'an mi' tsictiyel majqui wen ti la' tojlel? 20 Che' mi la' tempan la' b_Λ, mach jinic i Cena lac Yum mu' b_Λ la' c'ux. 21 Come che' mi la' c'ux ti jujuntiquiletla, mi la' se'ñun la' b_Λ cha'an mi la' bajñel ch'Λm la' waj. Juntiquil an i wi'ñal, yamb_Λ y_Λc. 22 ¿Mach ba anic la' wotot cha'an ya'i mi la' cha'len we'el uch'el? ¿Mu' ba la' ts'a'len jini xñopt'añob mu' b_Λ i tempañob i b_Λ? ¿Mu' ba la' w_Λc' ti quisin jini mach b_Λ añobic i b_Λl i ñ_Λc'? ¿Chuqui yom mic subeñetla? ¿Yom ba mic sub uts'at woli la' mel? Mach yomic. Mach uts'atic.

23 Come tsa'ix aq'uentiyon c sub i sujmllel i Cena lac Yum che' bajche' tsaj c_Λntesayetla. Lac Yum Jesús tsi' ch'Λm_Λ waj ti jini jach b_Λ ac'Λlel che' b_Λ tsa' ajq'ui ti' c'Λb i contra. 24 Che' b_Λ tsa' ujt i suben wocolix i y_ΛΛ Dios, tsi' xut'u. Tsi' y_ΛΛ: “Ch'Λm_Λla, c'uxula, jiñ_Λch c b_Λc'tal mu' b_Λ i xujt'el cha'añetla. Che'Λch yom mi la' cha'len cha'an mi la' ña'tañon”. Che' tsi' y_ΛΛ. 25 Che' ja'el, tsi' ch'Λm_Λ vaso che' b_Λ tsa' ujt i ti we'el. Tsi' y_ΛΛ: “Jini vaso jiñ_Λch i yejtal jini tsijib xuc'ul b_Λ t'an wa'chocobil b_Λ tic ch'ich'el. Che'Λch yom mi la' cha'len ti jujunyajl che' mi la' jap cha'an mi la' ña'tañon”, che'en. 26 Come ti jujunyajl che' mi la' c'ux jini waj, che' mi la' jap ti jini vaso, mi la' w_Λc' ti tsictiyel bajche' tsa' ch'Λmi lac Yum c'Λl_Λl mi' cha' tilel.

27 Jini cha'an jini mach b_Λ wenic bajche' mi' c'ux jini waj yic'ot bajche' mi' jap ti' vaso lac Yum, an

i mul, come mi' ts'a'len i b_Λc'tal yic'ot i ch'ich'el lac Yum. ²⁸ Ti jujuntiquil la' i bajñel ña'tan bajche' an i pusic'al. Che' jini, la' i c'ux jini waj, la' i jap ti jini vaso. ²⁹ Come jini mach b_Λ wenic mi' c'ux mi' jap, woli' p_Δy i wocol come ma'anic mi' ña'tan i b_Λc'tal lac Yum che' mi' c'ux che' mi' jap. ³⁰ Jini cha'an an cab_Λl c'amo' b_Λ ba' añetla, cab_Λl c'uño' b_Λ. Lamital ch_Λmeñob. ³¹ Tsa'ic lac ñaxan mele lac b_Λ, ma'anic tsa' aq'uentiyonla wocol. ³² Pero che' mi la c_Λq'uentel wocol, lac Yum woli' ju's_Λb_eñonla lac pusic'al cha'an ma'anic mi la cochel ti toj mulil yic'ot i cha'año' b_Λ pañimil.

³³ Jini cha'an quermanojob, che' mi la' tempan la' b_Λ cha'an mi la' c'ux waj, pijtan la' b_Λ. ³⁴ Mi an i wi'ñal juntiquil, la' i c'ux i waj ti' yotot, cha'an ma'anic mi la' w_Λq'uentel wocol cha'an chuqui woli la' mel che' mi la' tempan la' b_Λ. Mi an yamb_Λ wocol ti la' tojlel mi caj c subeñetla bajche' yom mi la' toj'esan ba' ora mij c'otel.

12

Laj c'ajñibal mu' b_Λ i y_Λq'ueñonla jini Espíritu

¹ Hermanojob, com mi la' ña'tan i sujmllel laj c'ajñibal tsa' b_Λ aq'uentiyonla ti jini Espíritu. ² La' wujil che' sajtemetla tsa' p_Δjyiyetla majlel ba'an x'uma' dios tac, bajche' jach tsa' ñijc_Λntiyetla. ³ Jini cha'an mic subeñetla mach c_Λntes_Δbilic ti' yEspíritu Dios majqui jach mi' y_Λl chocol ti Dios jini Jesús. Cojach jini c_Λntes_Δbil b_Λ ti Ch'ujul b_Λ Espíritu mi mejlel i pejcan Jesús ti' Yum.

⁴ Ti chajp ti chajp an laj c'ajñibal tsa' b_Λ aq'uentiyonla, pero juntiquil jach Espíritu. ⁵ Ti

chajp ti chajp an la que'tel, pero juntiquil jach lac Yum. ⁶ Ti chajp ti chajp an lac melbal, pero juntiquil jach Dios mu' b_Λ i ñijcañonla ti lac pejtelel. ⁷ Ti jujuntiquilonla aq'uebilonla laj c'Λjnibal ti jini Espíritu cha'an i wenlel pejtelelob. ⁸ Come juntiquil mi' y_Λq'uentel cab_Λ i ña't_Λbal cha'an jini Espíritu cha'an mi' sub i sujmllel jini t'an. Yamb_Λ mi' y_Λq'uentel cab_Λ i ña't_Λbal cha'an jini jach b_Λ Espíritu cha'an mi' cha'len c_Λntesa. ⁹ Yamb_Λ mi' y_Λq'uentel i ñop Dios ti wen xuc'ul cha'an jini jach b_Λ Espíritu. Yamb_Λ mi' y_Λq'uentel i c'Λjñibal ti lajmesaya cha'an jini jach b_Λ Espíritu. ¹⁰ Yamb_Λ mi' y_Λq'uentel i p_Λs i yejtal i p'Λt_Λlel Dios. Yamb_Λ mi' y_Λq'uentel i c'Λjñibal ti subt'an. Yamb_Λ mi' y_Λq'uentel i c_Λn mi wen o mi jontol jini espíritujob. Yamb_Λ mi' y_Λq'uentel i cha'len t'an ti yan tac b_Λ t'an. Yamb_Λ mi' y_Λq'uentel i ñusan i sujmllel yan tac b_Λ t'an. ¹¹ Jini juntiquil jach b_Λ Espíritu mi' y_Λq'ueñonla lac mel pejtelel ili tac. Ti chajp ti chajp mi' y_Λq'ueñob i c'Λjñibal winicob x'ixicob ti jujuntiquil che' bajche' yom Dios.

I b_Λc'tal Cristo

¹² An cab_Λl chuchbil tac b_Λ ti lac b_Λc'tal, pero jump'ejl jach lac b_Λc'tal. Che'Λch ja'el i b_Λc'tal Cristo yic'ot xñopt'añob. ¹³ Come juntiquil jach jini Espíritu. Che' bajche' ti ch'Λmja' tsi' tem otsayonla ti jump'ejl jach i b_Λc'tal Cristo, mi judío, mi griego, mi jini am b_Λ ti' yum, mi jini mach b_Λ anic ti' yum. Tsa' aq'uentiyonla lac ch'Λm jini jach b_Λ Espíritu.

¹⁴ Come jini lac b_Λc'tal mach junchajpic jach chuqui chuchbil pero cab_ΛΛch. ¹⁵ Jini la coc, mi tsi' y_ΛΛ mach i cha'anic lac b_Λc'tal come mach c'Λb_Λlic,

¿mach ba i cha'anic lac bΛc'tal che' jini? ¹⁶ Jini lac chiquin, mi tsi' yΛΛ mach i cha'anic lac bΛc'tal come mach wutΛlic, ¿mach ba i cha'anic lac bΛc'tal che' jini? ¹⁷ Mi ti pejtelel lac bΛc'tal to'o lac wut jach an, ¿bajche' mi la cubin t'an che' jini? Mi ti pejtelel lac bΛc'tal to'o lac chiquin jach an, ¿bajche' mi mejlel lac sic'? ¹⁸ Ti chajp ti chajp tsi' tempa Dios jini chucul tac bΛ ti lac bΛc'tal che' bajche' yom i pusic'al. ¹⁹ Mi to'ol c'ΛbΛl jach pejtelel lac bΛc'tal, ¿bajche' an lac bΛc'tal che' jini? ²⁰ Pero isujm an cabΛl chucul tac bΛ ti lac bΛc'tal anquese jump'ejl jach lac bΛc'tal.

²¹ Jini lac wut mach mejlic i suben laj c'Λb ma'anic i c'Λjñibal. Che' ja'el lac jol mach mejlic i suben la coc ma'anic i c'Λjñibal. ²² Pero jini chucul tac bΛ ti lac bΛc'tal mach bΛ p'ΛtΛlic yilal, ñumen an i c'Λjñibal. ²³ Jini chucul tac bΛ ti lac bΛc'tal mach bΛ yoque uts'atic mi laj q'uel, ñumen mi la cΛq'uen i t'ojΛwib. Jini mach bΛ i t'ojolic ti q'uelol mi lac mos ti pisil. ²⁴ Jini i t'ojol bΛ ti q'uelol ma'anic chuqui yom mi' yΛq'uentel. Che' bΛ tsi' tempa lac bΛc'tal Dios, tsi' yΛq'ue ñumen i c'Λjñibal jini mach bΛ ñuquic ti q'uelol. ²⁵ Che' jini, ma'anic mi' contrajiñob i bΛ jini chucul tac bΛ ti lac bΛc'tal. Mi' tem cΛntañob i bΛ. ²⁶ Mi tsi' taja wocol jump'ejl chucul bΛ ti lac bΛc'tal, mi la cubin ti pejtelel lac bΛc'tal. Mi tsi' taja i ñuclel, tijicña mi la cubin ti pejtelel lac bΛc'tal.

²⁷ Jatetla i bΛc'taletla Cristo. Jatetla miembro-jetla ti' bΛc'tal Cristo. ²⁸ Dios tsi' wa'chocoyonla ti' tojlel xñopt'añob, ñaxan jini apóstolob, wi'il subt'añob, wi'il xΛntesajob, wi'il jini mu' bΛ i

pʌsob i yejtal i p'ʌtʌlel Dios, yic'ot jini am bʌ i c'ʌjñibal ti ts'ʌcaya, yic'ot jini am bʌ i c'ʌjñibal ti coltaya, yic'ot jini am bʌ i ye'tel ti yumʌl, yic'ot jini mu' bʌ i cha'leñob t'an ti yan tac bʌ t'an.
²⁹ ¿Apóstolob ba ti pejtelel? ¿Subt'añob ba ti pejtelelob? ¿Xcantesajob ba ti pejtelelob? ¿Mu' ba i pʌsob i yejtal i p'ʌtʌlel Dios ti pejtelelob? ³⁰ ¿Am ba i c'ʌjñibal ti ts'ʌcaya ti pejtelelob? ¿Mu' ba i cha'leñob t'an ti yan tac bʌ t'an ti pejtelelob? ¿Mu' ba i ñusañob i sujmllel yan tac bʌ t'an ti pejtelelob?
³¹ Pero cha'lenla wersa la' taj jini ñumen wen bʌ la' c'ʌjñibal. Mi caj c pʌsbeñetla wʌle chuqui ñumen uts'at.

13

C'uxbiya

¹ Muq'uic c cha'len t'an ti' t'an tac winicob yic'ot ti' t'an ángelob, mi ma'anic j c'uxbiya, tsintsiñayon bajche' tsucu taq'uin. Lajalon bajche' tsucu taq'uin mu' bʌ i cujtʌl. ² Anic j c'ʌjñibal ti subt'an yic'ot c ña'tʌbal ti pejtelel i sujmllel mach bʌ tsic-tiyemic ti yambʌ ora, yic'ot pejtelel chuqui tac ña'tʌbil ti pañimil, muq'uic c ñop Dios ti xuc'ul bʌ c pusic'al cha'an mic tʌts' wits, pero mi ma'anic j c'uxbiya, ma'anic j c'ʌjñibal. ³ Muq'uic c laj pucbeñob c chubʌ'an cha'an mic we'san jini mach bʌ añobic i bʌl i ñac', muq'uic cʌc' c bʌ ti pulel cha'an mij coltañob, mi ma'anic j c'uxbiya, ma'anic chuqui mic taj.

⁴ Jini yujil bʌ c'uxbiya jal mi' cuchben i mul yaño' bʌ, wen uts i pusic'al. Jini yujil bʌ c'uxbiya mach tsʌytsʌyñayic i pusic'al che' mi' q'uel i wenlel i pi'ʌlob. Ma'anic mi' sub i bʌ ti ñuc. Ma'anic mi'

mel i bΛ ti chan ti' tojlel i pi'Λlob. ⁵ Jini yujil bΛ c'uxbiya mach lecojic i melbal. Ma'aníc mi' sajcan chuqui yom ti' bajñel pusic'al. Ma'aníc mi' bΛc' mich'an, ma'aníc mi' lot ti' pusic'al i contrajintel. ⁶ Mach tijicñayic mi' yubin che' mi' tic'Λntel jini toj bΛ. Tijicña mi' yubin che' uts'at mi' loq'uel jini toj bΛ. ⁷ Mi' ñusan pejtel wocol, mi' ñop pejtelel chuqui tac isujm, mi' cha'len pijtaya ti' xuc'talēl i pusic'al, mi' ñusan ti' uts'at pejtelel chuqui tac mi' yujtel.

⁸ Mach jilic i c'uxbiya ti pejtelel ora. Mi' caj ti ujtēl i c'Λjñibal subt'an. Mi' caj ti jilel yan tac bΛ t'an. Mi' caj i jilel i ña'tabal pañimil. ⁹ Come mach laj cΛmbilic lac cha'an. Mach ts'ΛcΛlic mi' lac tsictesan ti subt'an. ¹⁰ Che' mi' tilel jini ts'ΛcΛ bΛ, mi' caj ti jilel jini mach bΛ ts'ΛcΛlic. ¹¹ Che' alobon to tsac cha'le t'an che' bajche' alob. Tsac ña'ta che' bajche' alob. Tsac ch'Λmbe isujm che' bajche' alob. Che' bΛ tsa' ochiyon ti winic, tsaj cΛyΛ c mel che' bajche' alob. ¹² Come wΛle mi' lac yΛxña q'uel Cristo che' bajche' ti espejo. Pero che' mi' tilel mi' caj laj q'uelben i wut. WΛle wolic yΛxña cΛn, pero ti wi'il bΛ ora mi' caj c wen cΛn che' bajche' Dios mi' cΛñon. ¹³ WΛle anto lac cha'an uxchajp: lac ñopbal, lac pijtaya yic'ot laj c'uxbiya. Pero jini ñumen ñuc bΛ jiñach c'uxbiya.

14

Jini mu' bΛ i cha'len t'an ti yan tac bΛ t'an

¹ ChΛn cha'lenla c'uxbiya. Cha'lenla wersa cha'an mi' la' taj la' c'Λjñibal ti jini Espíritu. Jini ñumen uts'at bΛ jiñach la' c'Λjñibal ti subt'an.

² Come jini mu' bΛ i cha'len t'an ti yan tac bΛ t'an

ma'anic mi' pejcan i pi'ʌlob, cojach mi' pejcan Dios. Ma'anic mi' ch'ʌmbeñob isujm winicob. Mi' sub i sujmllel Dios ti yambʌ t'an ti Espíritu. ³Jini mu' bʌ i cha'len subt'an mi' xuc'chocobeñob i pusic'al winicob. Mi' xic'ob ti' melol chuqui uts'at. Mi' ñuq'uesʌbeñob i pusic'al. ⁴Jini mu' bʌ i cha'len t'an ti yan tac bʌ t'an mi' bajñel xuc'chocon i pusic'al. Jini mu' bʌ i cha'len subt'an mi' xuc'chocobeñob i pusic'al xñopt'añob mu' bʌ i tempañob i bʌ. ⁵Uts'at mi ti pejteletla an la' c'ʌjñibal ti yan tac bʌ t'an. Pero ñumen uts'at mi la' cha'len subt'an ti la' bajñel t'an. Come lolom jach yan tac bʌ t'an mi ma'anic majch mi' ñusʌbeñob i sujmllel cha'an mi' xuc'chocobeñob i pusic'al xñopt'añob. Che' jini ñumen an i c'ʌjñibal jini mu' bʌ i cha'len subt'an bajche' jini mu' bʌ i cha'len t'an ti yan tac bʌ t'an.

⁶Wʌle hermanojob, mi woliyon ti t'an ti yan tac bʌ t'an che' mic tilel ba' añetla, ¿chuqui i c'ʌjñibal la' cha'an? Cojach an i c'ʌjñibal mi tsac subeyetla ti la' t'an jini tsa' bʌ pʌsbentiyon, mi jini ña'tʌbil bʌ c cha'an, mi jini wen t'an, o mi cʌntesa. ⁷Jini música tac ja'el, che' bajche' amʌy yic'ot guitarra mach bʌ cuxulic, mi mach yʌñʌlic mi' loq'uel i t'an, ¿bajche' che' jini, mi' caj ti cʌjñel chuqui woli ti wustal ti amʌy yic'ot chuqui woli ti ñijcʌntel ti guitarra? ⁸Mi mach uts'atic mi' loq'uel i t'an trompeta, ¿majqui mi caj i chajpan i bʌ cha'an guerra? ⁹Che' ja'el jatetla, che' mi la' cha'len t'an ti yambʌ t'an mach bʌ anic mi' ch'ʌmbeñob isujm, ¿bajche' che' jini mi caj i ña'tañob chuqui mi la' wʌl? Che' jini to'ol t'an jach woliyetla. ¹⁰Isujm an cabʌl yan tac bʌ t'an ti pañimil. Ti jujunchajp an i sujmllel. ¹¹Mi ma'anic

mic ch'amben isujm junchajp t'an, che'ach mi' q'uelon jini mu' b_Λ ti t'an bajche' juntiquil ch'oyol b_Λ ti yamb_Λ lum. Joñon ja'el mij q'uel jini winic mu' b_Λ ti t'an che' bajche' juntiquil ch'oyol b_Λ ti yamb_Λ lum. ¹² Che' ja'el jatetla, come la' wom la' c'ajñibal mu' b_Λ i yac' jini Espíritu, cha'lenla wersa la' taj cab_Λ la' c'ajñibal cha'an mi la' xuc'chocon jini xñopt'añob mu' b_Λ i tempañob i b_Λ.

¹³ Jini cha'an jini mu' b_Λ i cha'len t'an ti yamb_Λ t'an la' i c'ajtiben Dios i ña't_Λbal cha'an mi' ñusan i sujmllel. ¹⁴ Mi wolic pejcan Dios ti yamb_Λ t'an mach b_Λ j cañayic, wolic pejcan tic ch'ujlel jach, mach tic ña't_Λbalic. ¹⁵ ¿Bajche' yom che' jini? Mi caj c pejcan Dios tic ch'ujlel, mi caj c pejcan tic ña't_Λbal ja'el. Mi caj c cha'len c'ay tic ch'ujlel, mi caj c cha'len c'ay tic ña't_Λbal ja'el. ¹⁶ Come mi ti a ch'ujlel jach ma' ch'ujutesan Dios ti' tojlel jini mu' b_Λ i tilel i ñich'tan, ¿bajche' mi caj i y_Λ amén che' ma' suben Dios wocolix i y_Λ_Λ, mi ma'anic mi' ch'amben isujm chuqui wola' w_Λ? ¹⁷ Isujm jatet ma' suben Dios wocolix i y_Λ_Λ ti uts'at, pero ma'anic mi' xuc'chocontel i pusic'al yamb_Λ. ¹⁸ Mic suben Dios wocolix i y_Λ_Λ, come ñumen mic cha'len t'an ti yan tac b_Λ t'an bajche' jatetla. ¹⁹ Uts'at mi c_Λ che' mic cha'len jo'p'ejl t'an yic'ot c ña't_Λbal cha'an mij c_Λntesan yaño' b_Λ. Mach uts'atic lujump'ejl mil t'an ti yamb_Λ t'an mach b_Λ yujilobic.

²⁰ Hermanojob, mach yomic lajal la' ña't_Λbal bajche' i ña't_Λbal alobob. Mach yomic jontoletla. Yom lajaletla bajche' al_Λlob. Yom lajal la' ña't_Λbal bajche' winicob año' b_Λ cab_Λ i pusic'al.

²¹ Ts'ijbubil: “Mi caj j c'amben i yej yaño' b_Λ

yic'ot yan tac b_Λ t'an cha'an mic pejcan ili winicob x'ixicob. Pero anquese che'ach mic pejcañob mach yomobic i yubibeñon c t'an", che'en lac Yum. ²² Jini t'an tac mach b_Λ cambilic jiñach i yejtal i p'at_Λlel Dios ti' tojlel jini mach b_Λ anic mi' ñopob Dios, mach ti' tojlelic jini mu' b_Λ i ñopob. Pero che' an majch mi' cha'len alt'an, an i c'ajñibal i cha'an jini mu' b_Λ i ñopob. Ma'anic i c'ajñibal i cha'an jini mach b_Λ anic mi' ñopob. ²³ Che' mi' la' tempan la' b_Λ xñopt'añet b_Λ la, mi ti jujuntiquiletla mi la' cha'len t'an ti yan tac b_Λ t'an, ¿chuqui mi caj i y_Λlob jini mach b_Λ cantesabilobic yic'ot jini mach b_Λ anic mi' ñopob? ¿Mach ba muq'uic caj i y_Λlob sojquem la' jol? ²⁴ Che' mi' yochel juntiquil mach b_Λ anic mi' ñop, o mi juntiquil mach b_Λ cantesabilic, mi ti pejteletla mi la' cha'len subt'an, che' jini mi' jec'bentel i pusic'al cha'an la' t'an ti la' pejtelel. Mi caj i ña'tan xmulilach. ²⁵ Mi' caj ti tsictiyel jini mucul tac b_Λ ti' pusic'al. Jini cha'an mi caj i p_Λcchocon i b_Λ cha'an mi' ch'ujutesan Dios. Mi caj i y_Λ: Ya'an Dios la' wic'ot ti isujm, che'en.

Toj yom jini ch'ujutesaya

²⁶ ¿Bajche' yom, che' jini, hermanojob? Che' mi la' tempan la' b_Λ, juntiquil an i salmo, yamb_Λ an i cantesabal, yamb_Λ mi' cha'len t'an ti yamb_Λ t'an, yamb_Λ mi' y_Λq'uentel chuqui mi' p_Λs, yamb_Λ mi' ñusan i sujmllel jini yan tac b_Λ t'an. La' mejlic ti pejtelel cha'an mi la' xuc'chocon la' b_Λ. ²⁷ Mi an mu' b_Λ i cha'leñob t'an ti yan tac b_Λ t'an jas_Λl cha'tiquil uxtiquil. Mach yomic i ñumel ti uxtiquil. Belecña yom mi' subob. La' i ñusan i sujmllel juntiquil. ²⁸ Mi ma'anic majch mi mejlel i ñusan i sujmllel jini t'an,

mach i cha'len t'an ti yambΛ t'an ba' mi' tempañob i bΛ. La' i bajñel pejcan Dios.

29 Che' ja'el la' i cha'leñob subt'an cha'tiquil ux-tiquil jach. Jini yaño' bΛ la' i yubiñob mi toj. 30 Mi an juntiquil buchul bΛ mu' bΛ i yΛq'uentel chuqui mi caj i sub, la' i cΛy i t'an jini ñaxan bΛ. 31 Come ti pejteletla mi mejlel la' q'uex la' bΛ ti subt'an cha'an mi la' cΛntesan la' bΛ ti pejtelel yic'ot cha'an mi la' xic' la' bΛ ti uts'at. 32 Jini aq'uebil bΛ jump'ejl t'an ti Dios mi mejlel i yujtesan i sub, o mi mejlel i poj cΛy cha'an mi' sub yambΛ. 33 Come Dios ma'anic mi' mulan jini ju'ucña bΛ, cojach ñΛch'Λl bΛ baqui jach mi' tempañob i bΛ i cha'año' bΛ Dios. 34 La' ajnicob ti ñΛch'Λl jini x'ixicob che' mi' tempañob i bΛ xñopt'añob. Come tic'bilob ti t'an. Yom mi' jac'ob i cΛntesΛntel che' bajche' mi' yΛ jini mandar. 35 Mi an chuqui yomob i ñop jini x'ixicob, la' i c'ajtibeñob i ñoxi'al ti' yotot. Come quisintic jax che' mi' cha'leñob t'an x'ixicob ba' mi' tempañob i bΛ xñopt'añob. 36 CΛxti mi ya'ic tsa' tejchi i t'an Dios ba' añetla. CΛxti mi ya'ic jach tsa' c'oti i t'an ya' ba' añetla.

37 Mi an majch mi' sub i bΛ ti subt'an mu' bΛ i jac'ben jini Espíritu, la' i ña'tan jiñΛch i mandar lac Yum tsa' bΛ c ts'ijbubeyetla. 38 Mi an juntiquil mach bΛ yomic i jac', mach la' jac'ben i t'an ja'el. 39 Jini cha'an hermanojob, cha'lenla wersa la' taj la' c'Λjñibal ti subt'an. Mach la' tic' jini mu' bΛ i cha'leñob t'an ti yan tac bΛ t'an. 40 Ti pejtelel chuqui tac mi la' cha'len, tem melela che' bajche' yom.

15

Tsa' tejchi ch'ojoyel Cristo

¹ Mic subeñetla ja'el hermanojob, jiñach jini wen t'an tsa' bΛ c subeyetla, tsa'ix bΛ la' ñopo, woli bΛ la' chΛñ ñop. ² Mi woli la' chΛñ ña'tan jini t'an tsa' bΛ c subeyetla, coltΛbiletixla, mi isujm tsa' la' ñopo che' bΛ tsa' la' subu la' bΛ ti hermano.

³ Come tsaj cΛntesayetla jini jach bΛ t'an tsa' bΛ aq'uentiyon. Tsa' chΛmi Cristo cha'an lac mul, che' bajche' mi' yΛ ti' Ts'ijbujel Dios. ⁴ Tsa' mujqui. Ti yuxp'ejlel q'uin tsa' cha' ch'ojoyi che' bajche' mi' yΛ ti' Ts'ijbujel Dios. ⁵ Tsa' tsictiyi ti' wut Pedro, wi'il ti' wut jini lajchΛntiquil. ⁶ Wi'il tsa' tsictiyi ti' wut ñumen ti' jo'c'al i cha'bjac' hermanojob che' temel añob. Cuxulob to cabΛ jini hermanojob, ojilil tsa' chΛmiyob. ⁷ Wi'il tsa' tsictiyi ti' wut Jacobo, wi'il ti' wut pejtelel apóstolob. ⁸ Wi'ilix tsa' tsictiyi tic wut ja'el. Che'ach añon bajche' juntiquil tsa' bΛ i yila pañimil che' ñumenix i yorajlel.

⁹ Come joñon mach lajalic c ñuelcl yic'ot yaño' bΛ apóstolob. Mach uts'atonic che' bΛ tsa' pΛjyiyon ti' apóstol, come tsac tic'la xñopt'añob i cha'an Dios. ¹⁰ Pero wΛle apóstolon cha'an ti' yutslcl i pusic'al Dios. Mach lolomic jach tsa' aq'uentiyon i yutslcl i pusic'al Dios. Ñumen cabΛ tsac cha'le e'tel bajche' pejtelel yaño' bΛ, pero mach joñonic, jiñach i yutslcl i pusic'al Dios am bΛ quic'ot. ¹¹ Tic pejtelel lojon, mi joñon o mi yaño' bΛ, mic sub lojon jini wen t'an, jini jach bΛ tsa' bΛ la' ñopo.

Mi caj i tejchelob ch'ojoyel chΛmeño' bΛ

¹² Mi wolic sub lojon tsa'ix tejchi ch'ojoyel Cristo, ¿chucoch mi' lon alob cha'tiquil uxtiquil ya' ba'

añetla ma'anic mi' ch'ojoyelob jini chameño' b_Λ?
¹³ Mi ma'anic mi' cha' ch'ojoyel jini chameño' b_Λ,
 che' jini, ma'anic tsa' ch'ojoyi Cristo ja'el. ¹⁴ Mi
 ma'anic tsa' ch'ojoyi Cristo lolom jach mic cha'len
 lojon subt'an. Lolom jach mi lac ñop ja'el. ¹⁵ Che'ic
 jini, lot jach mu' b_Λ c sub lojon, come tsa'ix c
 subu lojon: Dios tsi' teche ch'ojoyel Cristo. Pero
 mach isujmic lac t'an mi ma'anic mi' ch'ojoyelob
 jini chameño' b_Λ, come che' jini, Dios ma'anic tsi'
 teche ch'ojoyel Cristo. ¹⁶ Come mi ma'anic mi' tejch-
 elob ch'ojoyel, ma'anic tsa' tejchi Cristo ja'el. ¹⁷ Mi
 ma'anic tsa' tejchi ch'ojoyel Cristo lolom jach mi la'
 ñop. Che'ic jini, añet tola ti la' mul. ¹⁸ Sajtemob
 ja'el jini chameño' b_Λ tsa' b_Λ i ñopoyob Cristo. ¹⁹ Mi
 w_Λ' jach ti pañimil mi' poj coltañonla Cristo, ñumen
 p'ump'uñonla bajche' yaño' b_Λ winicob.

²⁰ Pero isujm tsa'ix tejchi ch'ojoyel Cristo ba'an
 chameño' b_Λ. Jiñach ñaxan b_Λ tsa' b_Λ ch'ojoyi.
²¹ Come cha'an ti' caj juntiquil winic mi' chamelob
 pejtelel winicob, che' ja'el cha'an ti' caj juntiquil
 winic mi' tejchelob ch'ojoyel jini chameño' b_Λ.
²² Come che' bajche' mi' chamelob pejtelel i p'olbal
 Adán, che' ja'el mi caj i cha' cuxtayelob pejtelel año'
 b_Λ ti' Cristo. ²³ Ti jujuntiquil mi' cha' tejchelob
 che' bajche' yom. Ñaxan tsa' ch'ojoyi Cristo, ti wi'il
 mi' cha' ch'ojoyel i cha'año' b_Λ Cristo che' mi' cha'
 tilel. ²⁴ Wi'il talix i jilibal ba' ora Cristo mi caj
 i yaq'uen i yumantel Dios i Tat che' mi' yujtel
 i jisabeñob i yumantel yic'ot i p'atalel pejtelel i
 contrajob. ²⁵ Come wersa mi' cha'len yumal Cristo
 jinto mi' t'uchtan pejtelel i contrajob. ²⁶ Mi caj i
 jisan ja'el jini cojix b_Λ laj contra mu' b_Λ i ya'c' ti

ch_Λmel lac b_Λc'tal. ²⁷ Come Dios tsi' y_Λc'Λ ti' wenta Jesús pejtelel chuqui tac an. Che' mi' y_Λl aq'uebil ti' wenta pejtelel chuqui tac an, tsiquil_Λch ma'anic tsi' y_Λc'Λ i b_Λ Dios ti' wenta Cristo che' b_Λ tsi' y_Λq'ue pejtelel chuqui tac an. ²⁸ Che' mi' yujtel i ch'Λm ti' wenta i Yalobil Dios, mi caj i y_Λc' i b_Λ ti' wenta Dios tsa' b_Λ i y_Λc'Λ ti' wenta pejtelel chuqui tac an. Che' jini Dios i ñuclel_Λch pejtelel chuqui tac an.

²⁹ Mi ma'anic mi' cha' ch'ojoyelob jini ch_Λmeño' b_Λ, ¿chuqui i ye'tel mi' ch'Λmob ja' jini cuxulo' b_Λ ti' wenta jini tsa'ix b_Λ ch_Λmiyob? ¿Chucoch che' jini mi' ch'Λmob ja' cha'an jini ch_Λmeño' b_Λ? ³⁰ ¿Chucoch che' jini mi' c_Λc' lojon c b_Λ ti' jujump'ejl q'uin ba' b_Λb_Λq'uen mic ch_Λmel lojon? ³¹ Mic subeñetla hermanojob, isujm ñuc c pusic'al mij q'ueletla ti lac Yum Jesucristo. Isujm ja'el b_Λb_Λq'uen mic ch_Λmel ti jujump'ejl q'uin. ³² Machic tsac ña'ta mi' cha' ch'ojoyelob ch_Λmeño' b_Λ, ¿chuqui to i ye'tel tsaj contraji jini jontolo' b_Λ ti Efeso? Mi ma'anic mi' cha' ch'ojoyelob jini ch_Λmeño' b_Λ, la' lac cha'len we'el uch'el, come mach jalix mi caj lac ch_Λmel. ³³ Mach yomic mi la' jac' la' lotintel. Jini jontolo' b_Λ lac pi'lob mi' bib'esañob lac pusic'al. ³⁴ Yom y_Λx_Λl la' wo bajche' yom. Mach la' cha'len mulil. Come an winicob x'ixicob mach b_Λ anic mi' c_Λñob Dios. Jini mic sub cha'an mij quisñitesañetla.

Bajche' yilal jini tsiji' b_Λ lac b_Λc'tal

³⁵ Pero an majqui mi caj i y_Λl: ¿Bajche' mi' tejche-lob ch'ojoyel jini ch_Λmeño' b_Λ? ¿Bajche' yilal i cuctal? che'en. ³⁶ Tontojet mu' b_Λ a w_Λl jini. Jini mu' b_Λ a p_Λc' ma'anic mi' coler mi ma'anic mi' ñaxan

mujquel. ³⁷ Jini mu' b_Λ a p_Λc' mach lajalic ti q'uelol bajche' jini mu' b_Λ i pasel. Jini mu' b_Λ a p_Λc' to'ol pac' jach, mi trigo, o mi yamb_Λ. ³⁸ Dios mi' y_Λq'uen i wut jini pac' bajche' yom. Ti junchajp pac' mi' y_Λq'uentel i wut ti chajp ti chajp. ³⁹ Che' ja'el mach junlajalic b_Λc'tal_Λl. Isujm junchajp i b_Λc'tal winicob, yamb_Λ i b_Λc'tal b_Λte'el, yamb_Λ i b_Λc'tal ch_Λy, yamb_Λ i b_Λc'tal te'lemut. ⁴⁰ An junchajp i b_Λc'tal jini año' b_Λ ti panchan, yamb_Λ i b_Λc'tal jini año' b_Λ ti pañimil. Junchajp i ñuclél jini año' b_Λ ti panchan, yamb_Λ i ñuclél jini año' b_Λ ti pañimil. ⁴¹ Junchajp i ñuclél jini q'uin, yamb_Λ i ñuclél jini uw, yamb_Λ i ñuclél jini ec', come i ñuclél jump'ejl ec' mach lajalic bajche' i ñuclél yamb_Λ ec'.

⁴² Che' _Λch ja'el che' mi' cha' ch'ojoyelob jini ch_Λmeño' b_Λ. Jini mu' b_Λ i mujquel mi' yoc'm_Λl. Jini mu' b_Λ i cha' ch'ojoyel mach yujilic oc'm_Λl. ⁴³ Ma'anic i ñuclél che' mi' mujquel. An i ñuclél che' mi' cha' ch'ojoyel. Ma'anic i p'_Λt_Λlel che' mi' mujquel. An i p'_Λt_Λlel che' mi' cha' ch'ojoyel. ⁴⁴ Ch'oyol ti lum lac b_Λc'tal mu' b_Λ i mujquel, ch'oyol ti Espíritu lac b_Λc'tal mu' b_Λ i tejchel ch'ojoyel.

An lac b_Λc'tal ch'oyol b_Λ ti lum, an lac b_Λc'tal ch'oyol b_Λ ti Espíritu. ⁴⁵ Che' _Λch ts'ijbubil: “Jini ñaxan b_Λ winic, i c'aba' Adán, tsa' aq'uenti i ch'ujlel. Pero Cristo an i yEspíritu cha'an mi' y_Λq'ueñonla laj cuxt_Λlel”. ⁴⁶ Ñaxan mi la c_Λq'uentel lac b_Λc'tal ch'oyol b_Λ ti lum, wi'ilix lac b_Λc'tal ch'oyol b_Λ ti Espíritu. ⁴⁷ Jini ñaxan b_Λ winic Adán melbil ti lum. Pero Cristo, i cha'ticel b_Λ winic, ch'oyol ti panchan. ⁴⁸ Jini año' b_Λ i b_Λc'tal ch'oyol b_Λ ti lum lajalob bajche' Adán ch'oyol b_Λ ti lum. Jini mu' b_Λ

i yaq'uentelob i bΛc'tal ch'oyol bΛ ti panchan lajalob bajche' Cristo ch'oyol bΛ ti panchan. ⁴⁹ WΛle lajalonla ti q'uelol bajche' Adán. Pero lajal mi caj la cajñel che' bajche' Cristo. ⁵⁰ Mic subeñetla, hermanojob, lac bΛc'tal yic'ot lac ch'ich'el yujil bΛ oc'mΛl mach ochic ti' yumΛntel Dios ba' ma'anic chuqui yujil oc'mΛl.

⁵¹ La' wilan, mic subeñetla jini mach bΛ tsic-tiyemic ti yambΛ ora: Mach ti pejtelonla mi caj lac chΛmel, pero ti pejtelonla mi caj lac yaññel. ⁵² Che' mi' wustΛl jini cojix bΛ trompeta, ti ora jach mi caj lac yaññel che' bajche' ora jach mi' mujts'el mi' cajñel lac wut. Come mi' caj ti wustΛl jini trompeta, mi caj i tejchelob ch'ojoyel jini chΛmeño' bΛ. Ma'anix mi' chΛn chΛmelob. Joñonla ja'el mi caj lac yaññel. ⁵³ Come jini yujil bΛ oc'mΛl wersa mi caj i pΛntiyel ti jini mach bΛ yujilic oc'mΛl. Jini yujil bΛ chΛmel wersa mi caj i pΛntiyel ti jini mach bΛ yujilic chΛmel. ⁵⁴ Che' bΛ tsa'ix pΛntiyi jini yujil bΛ oc'mΛl ti jini mach bΛ yujilic oc'mΛl, che' bΛ tsa'ix pΛntiyi jini yujil bΛ chΛmel ti jini mach bΛ yujilic chΛmel, che' jini mi caj i ts'actiyel jini ts'ijbubil bΛ t'an mu' bΛ i yał: "Lac Yum mi caj i junyajlel jisΛben i p'ΛtΛlel chΛmel. ⁵⁵ ¿Bacan i c'uxel che' mi lac chΛmel? ¿Bacan mi' mΛjlel i cha'an jini mucoñibΛl?" che'en. ⁵⁶ Jini c'ux bΛ, jiñΛch mulil mu' bΛ i yač'onla ti chΛmel. Jini mulil mi' taj i p'ΛtΛlel cha'an jini mandar. ⁵⁷ Wocolix i yałΛ Dios mu' bΛ i yaq'ueñonla lac p'ΛtΛlel ti lac Yum Jesucristo cha'an mi' mΛjlel lac cha'an.

⁵⁸ Jini cha'an, c'uxbibil bΛ quermanojob, chΛn ajñenla ti xuc'ul. Mach yomic tile bixel la' pusic'al. Yom bΛxetla che' mi la' cha'liben i ye'tel lac Yum,

come la' wujil mach lolomic jach la' we'tel ti lac Yum.

16

Ofrenda cha'an i colt Δ ntel i cha'año' b Δ Dios

¹ Cha'an ofrenda mu' b Δ la' temp Δ n cha'an i colt Δ ntel i cha'año' b Δ Dios, ac' Δ la jatetla che' bajche' tsac sube jini xñopt'año Δ b mu' b Δ i tempaño Δ b i b Δ ya' ti Galacia. ² Ti jini ñaxan b Δ q'uin ti jujump'ejl semana, ti jujuntiquiletla, parte yom mi la' w Δ c' lamital la' taq'uin. Lotola bajche' c'amel mi mejlel la' w Δ c' cha'an temp Δ bilix che' mij c'otel ba' añetla. ³ Che' c'otemon mi caj c choc majlel winicob año' b Δ i cha'an carta ba' mi' tsictiyel yajc Δ bilob cha'an mi' ch' Δ mob majlel jini ofrenda ti Jerusalén. ⁴ Mi yom Δ ch mic majlel ja'el, mi mejlel c pi'leño Δ b majlel ti Jerusalén.

Baqui tsi' ña'ta majlel jini Pablo

⁵ Ya' talon ba' añetla che' ñumeño Δ nix ti Macedonia, come com ñumel ti Macedonia. ⁶ Tic' Δ l ya' mic poj c Δ yt Δ l ba' añetla cha'an mic ñusan i yorajlel tsañal ja'el, cha'an mi la' pi'leño Δ n majlel ya' ba' mic majlel. ⁷ Come mach ñumelic jach com j q'ueletla. Com poj jalijel quic'otetla mi che' yom lac Yum. ⁸ Mi caj j c Δ yt Δ l ti Efeso c' Δ l Δ l ti' yorajlel Pentecostés. ⁹ Come tsa' jambentiyon colem puerta ba' mi mejlel c wen cha'len e'tel anquese cab Δ lob j contra.

¹⁰ Mi tsa' c'oti Timoteo, q'uelela cha'an mi' yajñel ti uts'at ba' añetla, come mi' cha'len i ye'tel lac Yum lajal bajche'on. ¹¹ Jini cha'an mach mi la' ts'a'len mi juntiquileticla. Cha' pi'lenla sujt Δ l ti' ñach'tilel la' pusic'al cha'an mi mejlel i cha' tilel ba'

añon, come wolic pijtan yic'ot yaño' bΛ hermanojob. ¹² Jixcu la quermano Apolos, cabΛ tsac sube ti wocol t'an cha'an mi' majlel yic'ot hermanojob ba' añetla. Maxto yomic majlel. Che' mi' tajben i q'uiñilel mi caj i majlel ba' añetla.

Cortesía tac

¹³ Yom yΛxΛl la' wo. Yom xuc'ul la' pusic'al mi la' ñop. Yom ch'ejletla. Yom p'ΛtΛletla. ¹⁴ Ti pejtelel chuqui tac mi la' mel, melela yic'ot c'uxbiya. ¹⁵ La' wujil hermanojob, jini ñaxaño' bΛ tsa' bΛ i ñopoyob Dios ya' ti Acaya, jiñobΛch Estéfnas yic'ot jini año' bΛ ti' yotot, tsa'ix i yΛc'Λyob i bΛ cha'an mi' coltañob i cha'año' bΛ Dios. ¹⁶ Mic subeñetla ti wocol t'an, jac'benla hermanojob mu' bΛ i melob che' bajche' jini, yic'ot pejtelob mu' bΛ i cha'leñob e'tel cha'an mi' coltañob i cha'año' bΛ Dios. ¹⁷ Tijicñayon cha'an tsa' tili Estéfnas yic'ot Fortunato yic'ot Acaico, come uts'at che' wΛ' añob jini uxtiquil anquese mach wΛ'ic añetla. ¹⁸ Come tsi' ñuq'uesΛbeyoñob c pusic'al yic'ot la' pusic'al ja'el. Q'uelela ti ñuc winicob mu' bΛ i melob che' bajche' jini.

¹⁹ Jini xñopt'añoob mu' bΛ i tempañob i bΛ ti Asia mi' yΛq'ueñetla cortesía. Che' ja'el Aquila yic'ot Priscila yic'ot jini xñopt'añoob mu' bΛ i tempañob i bΛ ti' yotot, cabΛl mi' yΛq'ueñetla cortesía ti lac Yum. ²⁰ Ti pejtelel jini hermanojob mi' yΛq'ueñetla cortesía. Che' mi la' wΛq'uen la' bΛ cortesía ts'ujts'un la' bΛ ti c'uxbiya.

²¹ Joñon Pablojon mic ts'ijbubeñetla cortesía tij c'Λb. ²² Jini mach bΛ anic mi' c'uxbin lac Yum Jesucristo la' chojquc ti Dios. Tal lac Yum. ²³ La'

ajñic i yutslel i pusic'al lac Yum Jesús la' wic'ot.
²⁴ Mij c'uxbiñetla ti la' pejtelel ti Cristo Jesús.

I T'an Dios
Bible without Deuterocanon in Chol Tumbala; ctu
(MX:ctu:Chol)

copyright © 1977 Wycliffe Bible Translators, Inc.

Language: Chol

Translation by: Wycliffe Bible Translators, Inc.

Chol, Tumbalá [ctu], Mexico

Copyright Information

© 1977, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Chol

© 1977, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

45de077a-5b47-572a-bd9d-72438a3be945